

HEBREOS

Marĩꝑꝝ ĩgũ magũ Jesucristo merã weredeamarẽ gojadea

¹ Iripoegue Marĩꝑꝝ ĩgũya kerere weredupiyunerã merã marĩ ñekũsãmarãrẽ werenũgãdi ããrĩmĩ. Yoaripoe wãri ĩgũ turari merã iri ĩmurĩ, ĩgũ weredoreri, kërõgue ĩmurĩ merã ĩgũsãrẽ ĩgũyare masĩmakũ iridi ããrĩmĩ.

² Dapagorare i ãmũ pereburi dupiyuro ĩgũ magũ Jesucristo merã marĩrẽ ĩgũyare weremi. Neõgoraguere Marĩꝑꝝ ĩgũ magũ merã i ãmũrẽ iridi ããrĩmĩ, ããrĩpereri ĩgũ gããmerõsũta ããrĩburo, ãrĩgũ. Irire iriburo dupiyuro ĩgũ magũrẽ pídi ããrĩmĩ, iri ããrĩpererire opabure. ³ Jesucristo, Marĩꝑꝝ gosesiririre opagũ, turatarigũ, õãtarigũ, Marĩꝑꝝ ããrĩrikurire opagũ ããrĩmĩ. ĩgũ turaro doreri merã ããrĩpereri i ãmũmarẽ ããrĩnĩkõãmakũ yãmi. Marĩ ñerõ iridea wajare tau odo, pũũ ãmũgasigue Marĩꝑꝝ turatarigũ diaye gapũ eja doadi ããrĩmĩ, ããrĩpererãrẽ doregũ ããrĩbu.

Marĩꝑꝝ magũ, Marĩꝑꝝre wereboerã nemorõ turagũ ããrĩmi, ãrĩ gojadea

⁴ Irasirigũ Marĩꝑꝝ magũ Jesucristo, Marĩꝑꝝre wereboerã nemorõ turagũ ããrĩmĩ. Marĩꝑꝝ ĩgũrẽ: “Makũ, mũ yũ magũ ããrã”, ãrĩdi ããrĩmĩ. Ángeles gapũre: “Yũre wereboerã ããrã”, ãrĩdi ããrĩmĩ. ⁵ ĩgũ magũrẽ ãsũ ãrĩdi ããrĩmĩ:

Y_u magũ ããrã m_u. Dapagã merã m_u, y_u magũ
ããrĩrĩrẽ masakare masĩmakũ yãa, ãrĩdi
ããrĩmĩ.✠

Neõ sug_u ĩgũrẽ wereboeg_ure irasũ ãrĩbiridi ããrĩmĩ.
Ĩgũ magũyamarẽ ãsũ ãrĩdi ããrĩmĩ doja:

Y_u, ĩgũ pag_u ããrã. ĩgũ, y_u magũ ããrĩmĩ, ãrĩdi ããrĩmĩ.✠

Neõ sug_u ĩgũrẽ wereboeg_ure irasũ ããrĩbiridi ããrĩmĩ.

⁶ ĩgũ magũrẽ sug_u ããrĩgũrẽ i ãm_ugue iriug_u, ãsũ
gap_u ãrĩdi ããrĩmĩ:

Ããrĩpererã y_ure wereboerã, y_u magũrẽ ejamejã,
b_uremuburo, ãrĩdi ããrĩmĩ.✠

⁷ ĩgũrẽ wereboerãyamarẽ ãsũ ãrĩdi ããrĩmĩ:

Y_ure wereboerãrẽ mirũ wějãpu taurosũ, peame
ũjũrĩ pũrã irirosũ waamakũ yãa, ãrĩdi
ããrĩmĩ.✠

⁸ ĩgũ magũ gap_ure ãsũ ãrĩdi ããrĩmĩ:

M_u ããrĩpererã Op_u ããrĩnĩgũ ããrã. M_uyarãrẽ diayeta
dorea.

⁹ Diayema iririre gããmea. Ñerõ iririre dooa. Irasir-
imakũ ĩãgũ, y_u m_up_u m_urẽ ããrĩpererã Op_u
ããrĩbure beyeb_u.

Irasirig_u m_urẽ ããrĩpererã m_u merãmarã nemorõ
m_unyari merã ããrĩmakũ irib_u, ãrĩdi ããrĩmĩ.✠

¹⁰ Idere ãrĩdi ããrĩmĩ Marĩp_u ĩgũ magũrẽ:

M_u ããrĩpererã Op_u, neõgoragueta i nikũ,
ãm_ugasidere irib_u.

¹¹ Gajipoe i ãm_u m_u iridea pereakõãrokoa. M_u gap_u
ããrĩnĩkõãg_ukoa. ããrĩpereri m_u iridea gap_u
surĩro boarosũ, boapereakõãrokoa.

✠ 1:5 Sal 2.7 ✠ 1:5 2 S 7.14; 1 Cr 17.13 ✠ 1:6 Dt 32.43 ✠ 1:7
Sal 104.4 ✠ 1:9 Sal 45.6-7

12 Irasirigũ suríro bũguñerẽ túwea béo, gajiñe maamañe gorawayurosũ, ããrĩpereri õãrĩ ditare gorawayugũkoa. Mũ gapũ neõ gorawayubirikoa. Murãrõta ããrĩnikõãgũkoa, ãrĩdi ããrĩmí.✧

13 Irasirigũ ãgũ magũrẽ ãsũ ãrĩdi ããrĩmí doja: Yũ diaye gapũ doaka! Mũ doaripoe murẽ ãaturirãrẽ mũ dorerire neõ tarinũgãnemobirimakũ irigũra, ãrĩdi ããrĩmí.✧

Ãgũrẽ wereboerã gapũre neõ irasũ ãrĩbiridi ããrĩmí.

14 ããrĩpererã Marĩpũre wereboerã deyomarĩrã, ãgũrẽ moãboerã ããrĩma. Marĩpũ Jesucristo taurãrẽ iritamudoregũ ãgũsãrẽ iriumí.

2

Marĩpũ ãgũ masakare tauri kerere õãrõ pémakũ gããmemi, ãrĩ gojadea

1 Irasirirã Marĩpũ magũ Jesucristoya kerere marĩ pédeare irasũ gũñaníkõãrõ gããmea, ãgũrẽ bũremurĩrẽ piriri, ãrĩrã. 2 Iripoegue Marĩpũ ãgũrẽ wereboerãrẽ ãgũya kerere weredoredi ããrĩmí. Irasirigũ: “Ñerõ irirãnorẽ, yũ dorerire tarinũgãrãrẽ wajamoãgũra”, ãrĩderosũta ãgũsãrẽ diayeta wajamoãdi ããrĩmí. 3 Marĩpũ masakare tauri kere õãtaria. Marĩ gapũ irire pémerã, ãgũ wajamoãrĩrẽ tausũbirikoa. Marĩ Opũ Jesucristo iri kerere wererũroridi ããrĩmí. ãgũ weredeare pérã: “Diyeta ããrã”, ãrĩ masĩnerã ããrĩmá. Irasirirã marĩdere wereturiamã, irire masĩburo, ãrĩrã. 4 Marĩpũ gaji irinemodi ããrĩmí. Iri kerere wererãrẽ ãgũ turari merã wãri iri ãmurĩrẽ irimakũ iridi

ãārĩmĩ. Irasũ ãārĩmakũ ĩgũ gããmederosũta ĩgũsãrẽ wári Ōãgũ deyomarĩgũ iritamurĩ merã irimasĩrĩrẽ sĩdi ãārĩmĩ, iri kerere weremakũ pérã: “Diayeta ããrã”, ãrĩ masĩburo, ãrĩgũ.

Jesucristo, marĩ irirosũ ðµpµkµgµ deyoadi ããrĩmi, ãrĩ gojadea

⁵ Marĩpµ ĩgũrẽ wereboerãrẽ: “I ãµµ peredero pµrµguere oparã ããrĩrãkoa mµsã”, ãrĩ, neõ píbiridi ããrĩmĩ. ⁶ ĩgũyare weredupiyudi ãsũ gapµ ãrĩ gojadi ããrĩmĩ:

Gµµ Opµ, masaka ubu ããrĩrã ããrĩkeremakũ, ¿nasirigu ĩgũsãrẽ gũnarĩ mµ? ĩgũsã boamurã dita ããrĩkeremakũ, ¿nasirigu ĩgũsãrẽ iritamurĩ mµ?

⁷⁻⁸ Yoabiripoegãta ĩgũsãrẽ mµrẽ wereboerã doka ããrĩmakũ iridi ããrĩbú. Irasirikeregµ, pµrµguere ĩgũsãrẽ oparã sóogµ, mµ turarire sĩbµ, ĩgũsãrẽ ããrĩpereri opaburo, ãrĩgũ, ãrĩ gojadi ããrĩmĩ.✧

Marĩpµ masakare irasũ sĩgũ: “Ããrĩpererire dorerãkuma”, ãrĩ pídi ããrĩmĩ. ĩgũsãrẽ irire píkeremakũ, ããrĩpererire dorebema dapa. ⁹ Marĩ Jesúyama gapµre: “Ããrĩpererã Opµ ããrĩmi”, ãrĩ masĩa. Yoabiripoegãta ĩgũdere Marĩpµ ĩgũrẽ wereboerã doka pídi ããrĩmĩ, ããrĩpererãya ããrĩburire boabosabure. Jesús marĩrẽ boabosamakũ, Marĩpµ ĩgũrẽ maĩgũ, õãrõ iritamudi ããrĩmĩ. Irasirigu ĩgũ boadigue masãdero pµrµ, Marĩpµ ĩgũrẽ turarire sĩ, Opµ sóodi ããrĩmĩ, ããrĩpererã ĩgũrẽ bµremuburo, ãrĩgũ.

✧ 2:7-8 Sal 8.4-6

10 Marĩpũ ĩgũ gããmederosũta ããrĩpereri i ãmũmarẽ iridi ããrĩmĩ. ããrĩpereri ĩgũya dita ããrã. ĩgũ pũrã ããrĩpererã ãmũgasigue ĩgũ ããrĩõgue ĩgũ merã ããrĩmakũ gããmemi. Irasirigũ ĩgũ magũ Jesũre iri-udi ããrĩmĩ, marĩrẽ ĩgũ ñerõ tariri merã taubure. ĩgũrẽ iriudi ããrĩmĩ, marĩ Opũ ããrĩbure, marĩrẽ ãmũgasigue ãĩmũrĩlabure. 11 Jesũs marĩrẽ taugũ, Marĩpũyarã ããrĩmakũ iridi ããrĩmĩ. Irasirirã marĩ ĩgũyarã ããrĩsã, sugũ pũrã irirosũ, Jesũs marĩ tĩgũ merã Marĩpũ pũrã ããrã. Irasirigũ Jesũs marĩrẽ: “Yũ pagũpũrã ããrĩma”, ãrĩgũ, neõ gũyasĩrĩbemi. 12 Marĩpũya werenĩrĩ gojadea pũgue Jesũs ĩgũ Pagũre weredeare gojasũdero ããrĩbũ. ãsũ ãrĩdi ããrĩmĩ ĩgũrẽ:

Mũ ããrĩrikũrĩre, mũyamarẽ weregũkoa yũ pagũpũrãguere. ĩgũsã nerẽnarõgue nerẽmakũ, ĩgũsã merã: “Õãtaria mũ”, ãrĩ bayapeogũkoa mũrẽ, ãrĩdi ããrĩmĩ.*

13 Gaji ãrĩdi ããrĩmĩ doja:

Yũde mũrẽ yũ Opũre bũremunĩkõãgũra.*

Idere ãrĩdi ããrĩmĩ doja:

Õõta ããrã Yũpũ pũrã ĩgũ yũre pĩnerã merã, ãrĩdi ããrĩmĩ.*

14 Marĩ, Marĩpũ pũrã, dupũkũrã ããrã. Irasirigũ Jesũde marĩ irirosũta dupũkũgũ aaridi ããrĩmĩ. ĩgũ curusague boari merã wãtĩrẽ, boarire gũirã opũre tarĩnũgã bẽodi ããrĩmĩ. 15 Jesũs ĩgũrẽ irasũ tarĩnũgãgũ, marĩ boaburire gũinĩkõãnerãrẽ taudi ããrĩmĩ. 16 ãsũ ããrã. Jesucristo Marĩpũre wereboerãrẽ iritamugũ meta aaridi ããrĩmĩ.

* 2:12 Sal 22.22 * 2:13 Is 8.17 * 2:13 Is 8.18

Marĩ, Abraham parãmerã gapure ãgũ Marĩpũre bũremuderosũta bũremurãrẽ iritamugũ aaridi ããrĩmĩ. ¹⁷ Irasirigũ marĩ irirosũta ðapũkũgũ aaridi ããrĩmĩ, ãgũ boari merã marĩ ñerĩ iridea wajare wajaribosabu. I merã Marĩpũre: “Waja opamerã ããrĩma”, ãrĩ ããmakũ iridi ããrĩmĩ. Paia opu marĩya ããrĩburire Marĩpũre sãrẽbosarosũ, ãgũde marĩrẽ õãrõ sãrẽbosami. Irasirigũ marĩrẽ bopoñarĩ merã ããgũ marĩrẽ õãrõ iritamunikõãmi. ¹⁸ Wãtĩ ããgũrẽ ñerõ iridoremakũ, Jesús bũro ñerõ tarikeregũ, ãgũ dorerire iribiridi ããrĩmĩ. Irasirigũ wãtĩ marĩdere ñerĩ iridoremakũ ããgũ, Jesús marĩrẽ iritamumasĩmi, ñerĩ iribirikõãburo, ããrĩgũ.

3

Jesús, Moisés nemorõ ããrĩmi, ããrĩ gojadea

¹ Yaarã, musã Marĩpũ beyenerã, ããgũyarã ããrã. Irasirirã Jesucristore: “Bũremua mũrẽ”, ããrĩnerã ããrĩsã, ããgũrẽ õãrõ gũñanikõãka! Marĩpũ ããgũrẽ iriudi ããrĩmĩ, ããgũya kerere werebure, paia opu irirosũ marĩya ããrĩburire sãrẽbosabure. ² Marĩpũ ããgũrẽ beyepĩdi ããrĩmĩ irire iribure. Irasirigũ Moisés, Marĩpũ ããgũrẽ: “Ãsũ iridoreka yaarãrẽ!” ããrĩ pĩdeare õãrõ iriderosũta Jesũde Marĩpũ ããgũrẽ pĩdea ããrĩpererire õãrõ iridi ããrĩmĩ. ³ Irasirirã Moisére bũremudero nemorõ Jesús gapure bũremurõ gããmea marĩrẽ. Iri ããsũ ããrã. Wiire: “Õãrĩ wii ããrã”, ããrĩ ããrõ nemorõ iri wiire iridi gapure: “Õãtarimi”, ããrĩ bũremurõ gããmea marĩrẽ. ⁴ Masaka gapũ wiiri irirã ããrĩma. Marĩpũ gapũ ããrĩpereri i ããmumarẽ iridi ããrĩmĩ. ⁵ Moisés gapũ Marĩpũyarãrẽ doregũ, ããgũsãrẽ õãrõ iritamudi ããrĩmĩ. “Ãsũ irika,

Marĩpũre buremurã!” ãrĩ weredi ããrĩmĩ, pũrugue marã Marĩpũya kerere pémasĩburo, ãrĩgũ. ⁶ Cristo, Marĩpũ magũ gapũ Moisés nemorõ Marĩpũyarãrẽ õãrõ doregũ ããrĩmi. Irasirirã marĩ Marĩpũyarã, gũñaturaire piriro marĩrõ ãgũ tauburire usũyari merã yúnirã, ãgũya wii marã ããrã.

Marĩpũ ãgũyarãrẽ ãgũ merã õãrõ siñajãmakũ gããmemi, ãrĩ gojadea

⁷ Irasirigũ Oãgũ deyomarĩgũ ire ãsũ ãrĩ weredi ããrĩmĩ, Marĩpũya werenĩrĩ gojadea pũgue:

Dapagãrẽ mũsã Opũ mũsãrẽ weremakũ, pẽduamerã irirosũ ããrĩbirikõãka!

⁸ Oãrõ péka ãgũrẽ! Iripoegue Israel bumarãrẽ masaka marĩrõgue ããrĩrãrẽ ãgũ werekeremakũ, ãgũ dorerire tarinũgãma. “Marĩrẽ iritamumasĩbirikumi”, ãrĩrã, ãgũrẽ buremubirima.

⁹ Irasirigũ ãsũ ãrĩmi: “Iroguere cuarenta bo-jorigora yũ turaro merã iririre iri ãmuadibũ ãgũsãrẽ iritamugũ. Yũ irasirikeremakũ: ‘ãgũ marĩrẽ iritamumasĩbirikumi’, ãrĩ gũñanama yũre.

¹⁰ Irasirigũ ãgũsã merã gua, ãsũ ãrĩbũ: ‘Yaa gapũre neõ gũñatũyabema. Yũ dorerire iridũabema’, ãrĩbũ.

¹¹ Irasirigũ ãgũsã merã guagũ, gopeyaro merã ãsũ ãrĩ werebũ: ‘Yũ merã õãrõ siñajãrĩ bokabirikoa mũsã yũre buremubiri waja’”, ãrĩmi.✧

¹² Irasirirã yaarã, õãrõ pémasĩka! Neõ sugũ mũsã watopemũ ñerõ gũña, buremubi ããrĩbirikõãburo.

✧ 3:11 Sal 95.7-11

Irasũ ããrĩgũno, Marĩpu ããrĩnĩgũrẽ bẽogu iribukumi. ¹³ ãsũ gapu iriro gããmea. Ɖmariku musã basi Marĩpuhare gãme werenĩka, ñerĩrẽ iriri, ãrĩrã! Dapagã merã Marĩpuhare werenĩrĩ gojadea pũgue dorederosũta gãme werenĩka! “Ñerĩ gapure irirã, usuyáa gũ”, ãrĩ gũñarã, musã basita ãrĩkatorã yáa. Ñerĩrẽ irirã, Marĩpu dorerire tarinũgãrãkoa. ¹⁴ Cristore bũremunũgãderosũta marĩ okaro bokatiũrõ bũremunĩkõãrã, ãgũ ããrĩrõgue ãgũ merã ããrĩrãkoa.

¹⁵ Yũ wererosũta Marĩpuhare werenĩrĩ gojadea pũgue ãsũ ãrĩ gojasũdero ããrĩbũ:
Dapagãrẽ Marĩpu musãrẽ weremakũ, ãgũrẽ õãrõ péka! Iripoegue Israel bumarã ãgũ dorerire tarinũgãderosũ iribirikõãka! ãrĩ gojasũdero ããrĩbũ.*

¹⁶ ãgũsã Marĩpuhare werenĩrĩrẽ pékererã, ãgũ dorerire tarinũgãnerã ããrĩmã. ããrĩpererã Egiptogue ããrĩrãrẽ Moisés ãĩãsũnerã ããrĩkererã, Marĩpu dorerire tarinũgãnerã ããrĩmã. ¹⁷ ãgũsã tarinũgãdea waja cuarenta bojorigora Marĩpu ãgũsã merã guadi ããrĩmĩ. Masaka marĩrõgue ãgũsãrẽ ããrĩdoredi ããrĩmĩ. Irogueta boanerã ããrĩmã. ¹⁸ ãgũ dorerire tarinũgãmakũ ããgũ, gopeyaro merã ãgũsãrẽ ãsũ ãrĩ weredi ããrĩmĩ: “Yũ merã õãrõ siñajãrĩ bokabirimakũ irigũra”, ãrĩdi ããrĩmĩ. ¹⁹ Irasirirã ire masĩa marĩ. ãgũsã Marĩpuhare bũremubiridea waja ãgũ merã õãrõ siñajãrĩ bokabirinerã ããrĩmã.

4

¹ Marĩpu iripoegue marãrẽ: “Yũ merã siñajãrĩ

* 3:15 Sal 95.7-8

bokarãkoa”, ãrĩ píderosũta marĩdere pídi ããrĩmĩ. Irasirirã marĩde goepeyaro merã Marĩpure yujuro gããmea, ĩgũ merã õãrõ siñajãrĩ bokamurã. ² Marĩpu masakare tauri kerere iripoegue marã péderosũta marĩde pébu. ĩgũsã gapu iri kerere pékererã, buremurĩ merã pébirinerã ããrĩmã. Irasirirã irire ubugorata péunanerã ããrĩmã. ³ Marĩ gapu Marĩpure buremurã ĩgũ merã õãrõ siñajãrĩ bokarãkoa. ĩgũrẽ burenumerã gapure ãsũ ãrĩdi ããrĩmĩ:

Yure buremubiri waja ĩgũsã merã guabu. Irasirigu ĩgũsãrẽ goepeyaro merã ãsũ ãrĩ werebu: “Yu merã õãrõ siñajãrĩ bokabirikuma”, ãrĩdi ããrĩmĩ.✧

I umurẽ iri odo, siñajãdi ããrĩmĩ. Irasirigu masakadere ĩgũ merã siñajãburire pídi ããrĩmĩ. ⁴ Gaji ãsũ ãrĩ gojasũdero ããrĩbũ, ĩgũya werenĩrĩ gojadea pũgue:

I umuma ããrĩpererire iripeo odogu, su mojõma pere gaji mojõ peru pẽrẽbejarinurĩ waaró merã ĩgũ moãrĩrẽ piri, siñajãdi ããrĩmĩ.✧

⁵ ĩgũrẽ burenumerã gapure ãsũ ãrĩdi ããrĩmĩ doja ĩgũya werenĩrĩ gojadea pũgue:

Yu merã õãrõ siñajãrĩ bokabirikuma, ãrĩdi ããrĩmĩ.✧

⁶ Iripoegue marã, ĩgũ masakare tauri kerere pépurorinerã, ĩgũ dorerire tarinugãdea waja ĩgũ merã õãrõ siñajãrĩ bokabirinerã ããrĩmã. Gajirã gapu ĩgũrẽ buremurã ĩgũ merã õãrõ siñajãrĩ bokarãkuma. ⁷ Irasirigu Marĩpu masakare ĩgũ merã siñajãburire pígu: “Dapagorare yure õãrõ péka!” ãrĩdi ããrĩmĩ. Israel bumarã ĩgũ dorerire

tarinugãdero puru, yoaripoe puru irire Davire gojadoredi ããrĩmĩ. Irasirigũ mũsãrẽ dupaturi irire weregũra doja. ãsũ ãrĩ gojadi ããrĩmĩ David:

Dapagorare Marĩpu mũsãrẽ weremakũ, õãrõ péka!
 Ìgũrẽ péduamerã irirosũ ããrĩbirikõãka! ãrĩ
 gojadi ããrĩmĩ.✧

⁸ Iripoegue David irire gojaburi dupiyuro Josué Israel bumarãrẽ Marĩpu ìgũsãrẽ sídea níkũgue ãĩjadi ããrĩmĩ. Iro gapũre siñajãrĩ bokabirinerã ããrĩmã. Irasirigũ Marĩpu ìgũyarãrẽ gaji siñajãrĩ síburire weredi ããrĩmĩ. ⁹ Irasirirã, Marĩpu i ãmũrẽ iri odo, ìgũ siñajãderosũta marĩ ìgũyarãde ìgũ merã õãrõ siñajãrĩ bokarãkoa. ¹⁰ Marĩpu merã siñajãrã, marĩ gããmerõ moãrĩrẽ piri, ìgũ gããmerĩ gapũre iripũrorirã, ìgũ merã õãrõ siñajãnĩkõãrãkoa, ìgũ i ãmũmarẽ iri odo siñajãderosũta. ¹¹ Irasirirã ìgũrẽ õãrõ bũremurõ gããmea, ìgũ merã siñajãrĩ bokamurã. Iripoegue marã ìgũrẽ bũremubirídea waja ìgũ merã neõ siñajãrĩ bokabirinerã ããrĩmã. Ìgũsã iriderosũ iribirikõãrõ gããmea marĩrẽ.

¹² Marĩpũya werenĩrĩrẽ pérã, ìgũ merã õãrõ ããrĩnĩkõãa. Sareri majĩ pe gapũ usiri majĩ sareñajãrõ nemorõ Marĩpũya werenĩrĩ marĩya yũjũpũrãrĩgue, marĩ gũñarĩgue ñajãrokoa. Irasirirã ìgũya werenĩrĩrẽ pérã, marĩya yũjũpũrãrĩmarẽ marĩ gũñarĩdere: “I gapũ õãgorãa, o i gapũ ñegorãa”, ãrĩ masĩrãkoa. ¹³ Marĩ masaka ããrĩpererã Marĩpu irinerã dita ããrã. Ìgũ ìãberogue neõ ããrĩbea. ããrĩpereri marĩ ããrĩrikũrĩre marĩ iririkũrĩre masĩmi. Irasirirã õãrĩ gũñarĩ oparã

✧ 4:7 Sal 95.7-8

õarõ irirã, ãgũ ãũrõ marĩ irideare, marĩ gũñadeare weredoremakũ, gũyasĩrĩrõ marĩrõ weremasĩrãkoa.

Jesús paía opũ nemorõ ããrĩmi, ãrĩ gojadea

¹⁴ Jesús, Marĩpũ magũ, paía opũ nemorõ marĩya ããrĩburire Marĩpũre sërẽbosagũ ããrĩmi. ãgũ Marĩpũ pũrogue ããrĩmi. Irasirirã neõ piriro marĩrõ ãgũrẽ bũremunikõãrã! ¹⁵ Jesús paía opũ nemorõ, marĩ turamerãrẽ bopoñarĩ merã ããgũ marĩrẽ iritamugũ ããrĩmi. Wãtĩ marĩrẽ ñerĩrẽ iridorerosũta Jesúdere ããrĩpereri ñerĩrẽ iridoredi ããrĩmĩ. Jesús gapũ ñerĩrẽ neõ iribiridi ããrĩmĩ. ¹⁶ ãgũ marĩya ããrĩburire sërẽbosagũ ããrĩmakũ ããrã, Marĩpũre gũiri marĩrõ marĩ sërẽmasĩa. ãgũ ããrĩrõgue ãgũ merã ããrĩrã irirosũ sërẽmasĩa. ãgũ marĩrẽ maĩgũ, marĩrẽ bopoñarĩ merã ããsĩa, marĩ ñerõ tariripoere diayeta iritamugũkumi.

5

¹ Marĩ ire masĩa. Sugũ paía opũ, masaka watope Marĩpũ beyepĩsũdi ããrĩmi. Masakaya ããrĩburi ããrĩpererire Marĩpũre sërẽbosagũ ããrĩmi. Irasirigũ Marĩpũre ãgũsã sũduarire sĩbosagũ ããrĩmi. “ãgũsã ñerĩ iridea waja ãgũsãrẽ wajamoãbirikõãka!” ãrĩ sërẽgũ, Marĩpũ ãũrõ waibũre wẽjẽ soepeobosagũ ããrĩmi. ² Paía opũ marĩ irirosũta ãgũ turari merã ãgũ ñerĩ iriduarire tau kãmutamasĩbemi. Irasirigũ pẽmasĩmerãrẽ, ñerõ irirãrẽ bopoñarĩ merã ããmasĩmi. ³ Turabi ããrĩsĩa, gajirãrẽ iribosarosũta ãgũ basi ñerõ iridea waja Marĩpũ ãũrõ waibũre wẽjẽ soepeomi.

⁴ Neõ sugũ ãgũ gããmerõ paía opũ ñajãmasĩbemi. Marĩpũ gapũ ãgũrẽ beyepĩmi, iripoeguemu Aarõrẽ

Īgū beyepíderosūta. ⁵ Cristode Īgū gāāmerō paía opu ñajābiridi āārīmí. Marīpu Īgūrē Opu pídi āārīmí. Āsū ārīdi āārīmí Īgūrē:

Yu magū āārā mu. Dapagā merā mu, yu magū āārīrīrē masakare masīmakū yāa, ārīdi āārīmí.✧

⁶ Gajirogue Īgūya werenírī gojadea pūgue Īgū magūrē āsū ārīdi āārīmí:

Melquisedec paí āārīderosūta mu āārīnīkōāgukoa, ārīdi āārīmí.✧

⁷ Cristo i ūmugue āārīgū, buro oreri gaguinírī merā Marīpure Īgū turari merā Īgū boaburire taumasīgūrē sērēdi āārīmí. Īgū, Marīpu gāāmerī ditare iridūamakū Īgū, Īgū sērērīrē pé, Īgūrē gūñaturamakū iridi āārīmí. ⁸ Cristo, Marīpu magū āārīkeregu, buro ñerō taridi āārīmí. Ñerō tarikeregu, Marīpu dorerire tarinūgārō marīrō Īgūrē oārō yujuri merā irire iritariweredi āārīmí.

⁹ Īgū curusague boagu, āārīpereri Marīpu Īgūrē iridoredeare iripeodi āārīmí. Irasirigu āārīpererā marīrē Īgūrē yujurārē taudi āārīmí, Īgū puro perebiri okari opaburo, ārīgū. ¹⁰ Irasirigu Marīpu Īgūrē: “Melquisedec paí āārīderosūta mu āārīnīkōāgukoa”, ārī pídi āārīmí, marīya āārīburire sērēbosabure.

Jesucristore buremurīrē piriri, ārīrā, Īgūrē gūñaturanīkōārō gāāmea, ārī gojadea

¹¹ Cristo paía opu nemorō āārīrīrē wári werenemodūadāa. Musā pémasīturabirimakū, irire weremasībirikoa. ¹² Musā yoaripoe Cristore buremubu. Irasirirā dapagoraguere

gajirārē Marīp̄yare buerimasā āārībukoa. M̄sā irasū āārībonerā, dapagoraguedere neō buep̄rorirā irirosūta āārīkōāa. Ōp̄kū mirīrā, baari baagamasīmerā, majīrāgā irirosūta āārīkōāa. Irasirirā gajirā buerimasā m̄sārē buep̄rorideare dupaturi buero gāāmea. ¹³ Ōp̄kū mirīrā majīrāgā irirosū āārīrāno, “I ñerī, i gapu ōārī āārā”, ārī beyemasībema. ¹⁴ Baari buriri gapu m̄rā baari āārā. M̄rā āārīrāno, ōārō buenerā, ōārīrē, ñerīrē beyemasīrāgue āārīma.

6

¹ Irasirirā m̄rā pémasīrā irirosū Cristoyamarē ōārō pémasīrā dujarā, irire buenemorō gāāmea. Neōgorague īgūyare buep̄rorirā, marī ñerō irideare bujawere, gūñarī gorawayurire buebu, Marīp̄ marīrē perebiri peamegue béori, ārīrā. Marī ñerō iririk̄deare piri, Marīp̄re ōārō buremurīdere buebu. ² Gajidere, deko merā, Ōāgū deyomarīgū merā wāiyerire buebu. Marī oparā īgūsāya mojōrī merā marīrē: “Marīp̄ m̄rē iritamuburo”, ārī ñapeoridere buebu. Boanerā masāburire, Marīp̄ Cristore buremumerārē perebiri peamegue wajamoāburidere buebu. ³ Irasirirā marī Cristore buremurā īgūyare buenemowāgānīkōārākoa, Marīp̄ gāāmemakū īgū iritamurī merā masīnemorā.

⁴ Āsū āārā. Masaka Jesucristoya kerere pémasīkererā, Marīp̄ īgūyarārē ōārī sīburire masīkererā, Ōāgū deyomarīgūrē opakkererā, ⁵ Marīp̄ ōārī werenírīrē pékererā, i ūmu peredero p̄m̄ īgū turari merā iriburire

masĩkererã, ⁶ iri gapure gããmemerã, neõ dupaturi ãgũsã ñerõ irideare bujawereri merã pirimasĩbirikuma. Neõ dupaturi ãgũsã gũñarĩrẽ õãrĩ gapu gorawayumasĩbirikuma. Irasirirã Marĩpu yare gããmebiri waja, Marĩpu magũ Cristore buremumerã, ãgũrẽ dupaturi curusague pábiatú wẽjẽrã irirosũ ããrĩrãkuma. Gajirãrẽ ãgũrẽ masaka iũrõgue buridamakũ irirãkuma. ⁷ Æsũ ããrã. Marĩ, su pooema nikũ irirosũ ããrã. Õãrĩ nikũrẽ ãmuriku deko merẽmakũ, sibi ñajãnakoa. Irasiriro iri pooe opu otedea õãrõ puri dukakukoa. Irasirigu iri pooe opu dukare opakumi ãgũ baaburire. Gajirã iri yebare õãrĩ dukakumakũ ããrã: “Marĩpu õãrõ dukakumakũ irikumi”, ãrĩkuma. Irasũta yãmi Marĩpu ãgũyare pẽrãrẽ. Gajirã ãgũsã ãgũyare õãrõ irimakũ ããrã: “Marĩpu ãgũsãrẽ õãrõ iritamumi, irasirirã õãrõ yãma”, ãrĩrãkuma. ⁸ Iri pooeere pora, ñerĩ tá dita puri dukakumakũ, béokõãrõ gããmea. Irasũta yãmi Marĩpu ãgũyare pẽkererã irimerãrẽ. Perebiri peamegue béogukumi ãgũsãrẽ wajamoãgũ.

Jesucristore buremurĩrẽ piriro marĩrõ marĩ ãmugasigue waaburire yũro gããmea, ãrĩ gojadea

⁹ Yu, Marĩpu ãgũsãrẽ béoburire weregu, musãrẽ yu maĩrãrẽ: “Ãgũ béosũmurã ããrã”, ãrĩgũ meta yãa. Marĩpu musãrẽ Cristo merã taudi ããrĩmĩ, ãgũyarã ããrĩburo, ãrĩgũ. Irasirirã musã õãrĩ yebague otedea õãrõ dukakurosũta õãrĩrẽ yãa. Irire yu masĩa. ¹⁰ Marĩpu diayema irigu ããrĩmĩ. Irasirigu ãgũyare musã õãrõ iririre kãtibirikumi. Musã ãgũrẽ maĩsĩa, gajirã ãgũyarãrẽ iritamurĩdere kãtibirikumi. ¹¹ Yu, musã okaropa usuyari merã

gajirārē iritamunímakū gāãmea. Irasirirã Marĩpũ ĩgũyarārē: “Ōãrĩrē sĩgũra”, ãrĩdeare musã yúrire, purugue diayeta oparãkoa. ¹² Irasirigũ musã Marĩpũyare téri merã iritayamakū gāãmebea. Gajirã Marĩpũ Jesucristo merã tauri kerere bũremurã ñerõ tarikererã, Marĩpũre: “Diayeta yure iritamugukumi”, ãrĩ bũremuníkõãma. ĩgũsã irasirimakū ĩãgũ, Marĩpũ ĩgũyarārē: “Ōãrĩrē sĩgũra”, ãrĩdeare ĩgũsãrē sĩgũkumi. Irasirirã musãde ĩgũsãrē ĩãkũĩ, ĩgũsã irirosũta iriníkõãka!

¹³⁻¹⁴ Iripoegue Marĩpũ Abrahãrē ãsũ ãrĩ pídi ããrĩmĩ: “Diayeta murē õãrĩrē irigura yũ ãrĩderosũta. Mũ parãmerã ããrĩturiarãrē wãrã ããrĩmakū irigura”, ãrĩ pídi ããrĩmĩ. Irasũ ãrĩ pígu, ĩgũ wãĩ merã wãĩpeodi ããrĩmĩ. Gajigu ĩgũ nemorõ ããrĩgũ neõ marĩmakũ, ĩgũ wãĩ merã wãĩpeodi ããrĩmĩ. ¹⁵ Abraham, Marĩpũ ĩgũrē ãrĩ pídeare õãrõ bũremurĩ merã yúdi ããrĩmĩ. Irasirigũ Marĩpũ ĩgũ ãrĩderosũta ĩgũrē õãrõ iridi ããrĩmĩ. ¹⁶ Sugũ masakũ gajirã péuro: “Diayeta ãrĩgũ yãa”, ãrĩgũ, ĩgũ nemorõ ããrĩgũya wãĩ merã wãĩpeokumi. ĩgũ irasũ ãrĩ wãĩpeomakũ pérã: “Diayeta werekumi”, ãrĩ, ĩgũ merã neõ guaseomasĩbirikuma. ¹⁷ Irasirigũ Marĩpũ Abrahãrē: “Diayeta murē õãrĩrē irigura”, ãrĩ pígu, ĩgũ wãĩ merã wãĩpeodi ããrĩmĩ. Marĩ ĩgũ irasũ wãĩpeo were-deare pérã: “ĩgũ ãrĩderosũta diayeta irigukumi”, ãrĩ masĩa. “ĩgũ ãrĩdeare neõ gorawayubirikumi”, ãrĩ masĩa. Irasirigũ irire marĩrē õãrõ masĩburo, ãrĩgũ, Abrahãrē ãrĩ pídeare weregũ, ĩgũ wãĩ merã wãĩpeodi ããrĩmĩ. ¹⁸ Marĩpũ neõ ãrĩkatobi ããrĩmĩ. Irasirigũ ĩgũ ãrĩ pídea merã, ĩgũ wãĩpeodea merã, ĩgũ ãrĩdea neõ

gorawayubiriburire marĩrẽ masĩmakũ iridi ããrĩmĩ. Marĩ irasirigũre masĩrã, marĩ ñerõ irideare piri, ãgũ marĩrẽ tauburire gũñaturari merã yúa. “Irasũta irigũkumi”, ãrĩ masĩa. ¹⁹ Irasirigũ Marĩpũ marĩrẽ ãgũ õãrõ iriburire yúrãrẽ ãmũgasigue ãgũ merã ããrĩmakũ irigũkumi. ãgũ turatarigũ ããrĩsĩa, irire diayeta irigũkumi. Irire õãrõ masĩa marĩ.

Ãsũ ããrã. Sugu paía opu Marĩpũ ããrĩrĩ taribu poekague ñajãgũ, iri taribu makãpuro kãmutari gasiro tariñajãmi. Irasũ ñajãgũ, masakaya ããrĩburire sërẽbosami Marĩpũre. ²⁰ Marĩpũ ããrĩrĩ taribugorague ñajãrõsũ Jesús ãmũgasigue Marĩpũ ããrĩrõgue ñajãdi ããrĩmĩ. Marĩ iroque ñajãburi dupiyuro ñajãsiadi ããrĩmĩ, paía opu nemorõ Marĩpũre marĩya ããrĩburire sërẽbosanĩkõãbu. Melquisedec paí ããrĩderosũta ããrĩnĩkõãgũkumi.

7

Melquisedec paí ããrĩderosũta Jesús ããrĩmĩ, ãrĩ gojadea

¹ Iripoegue Melquisedec wãĩkũgũ Salem* wãĩkuri makã marã opu ããrĩdi ããrĩmĩ. ãgũ paí ããrĩgũ, masakaya ããrĩburire Marĩpũre ããrĩpererãrẽ doregure sërẽbosagu ããrĩdi ããrĩmĩ. Abraham gajirã oparãrẽ wẽjẽ tarinũgãgũ ejadi goedujãamakũ, Melquisedec ãgũrẽ bokatĩrĩgũ waadi ããrĩmĩ. ãgũrẽ bokatĩrĩgũ, Marĩpũre: “Guapũ, ãrẽ õãrõ irika!” ãrĩ sërẽbosadi ããrĩmĩ. ² Abraham gajirã oparãrẽ wẽjẽ tarinũgãsĩa, ãgũsãya ããrĩdeare ããdi ããrĩmĩ. Irasirigũ ãgũ ãideare pe mojõma

* **7:1** Salem wãĩkuri makã, Jerusal'eta ããrĩyuro.

buri dukawa pí, subu sídi ããrĩmĩ Melquisedere. “Melquisedec”, ãrĩrõ: “Opũ diayeta irigũ”, ãrĩduaro yáa. Īgũ Salem marārē doregũ ããrĩdi ããrĩmĩ. Īgũyarārē õãrõ siñajārĩ merã ããrĩmakũ iridi ããrĩmĩ. Irasiriro: “Salem”, ãrĩrõ: “Siñajārĩ”, ãrĩduaro yáa. ³ Melquisedec pagũsãmarārē, Īgũ ñekũsãmarārē Īgũsã were gojatúdea neõ máa. Īgũ deyoadeare, Īgũ boadeare, Īgũrē gorawayubure were gojatúdea neõ máa. Irasirigũ Īgũ, Marĩpũ magũ Jesucristo paí ããrĩnkõãgũ irirosũ ããrĩdi ããrĩmĩ.

⁴ Irasirirã Melquisedere gũñaka! Ubu ããrĩgũ meta ããrĩdi ããrĩmĩ. Marĩ ñekũ Abraham marĩya bumũ ããrĩpũroridi ããrĩkeremakũ, Melquisedec, Abraham nemorõ ããrĩdi ããrĩmĩ. Irasirigũ Abraham Melquisedere, gajirã oparārē wējē tarinũgãsĩã, Īgũsãya ããrĩdea ãĩadeare pe mojõma buri dukawa pí, subu sídi ããrĩmĩ. ⁵ Āsũ ããrã. Moisés dorederosũta ããrĩpererã gajirã Israel bumarã Īgũsãyare, Levĩ parãmerã ããrĩturiarārē paía ããrĩrārē keoro sĩma. Abraham Levĩya bumarã ñekũ ããrĩdi ããrĩmĩ. Īgũ ããrĩpererã gajirã Israel bumarã ñekũ ããrĩdi ããrĩmĩ. Īgũ, Īgũsã ñekũ ããrĩdi ããrĩkeremakũ, Īgũsã gapũ Moisés dorederosũta irirã, Levĩ parãmerã ããrĩturiarã ditare sĩma. ⁶ Melquisedec gapũ Levĩ parãmi ããrĩturiagũ ããrĩbiridi ããrĩmĩ. Abraham gapũ Marĩpũ: “Õãrõ irigũra”, ãrĩ písũdi ããrĩkeregũ, Melquisedere sídi ããrĩmĩ. Irasirigũ Melquisedec Abrahãrē: “Marĩpũ mũrē õãrõ iriburo”, ãrĩdi ããrĩmĩ. ⁷ Irasirirã marĩ ire masĩa. Melquisedec Abrahãrē: “Marĩpũ mũrē õãrõ iriburo”, ãrĩgũ,

Abraham nemorõ ããrĩdi ããrĩmĩ. ⁸ Gajire masĩa. Paía, marĩ watope ããrĩrã, marĩ irirosũta masaka ããrĩma. Irasirirã boamurãta ããrĩma. Moisés dorederosũta irirãno, ãgũsãyare pe mojõma buri oparire subu sĩma paíare. Abraham Melquisedere sĩgũ, ããrĩnĩgũ irirosũ ããrĩgũrẽ sĩdi ããrĩmĩ. Marĩpũya werenĩrĩ gojadea pũgue Melquisedere: “Boakõadi ããrĩmĩ”, ãrĩ gojadea neõ máa. ⁹⁻¹⁰ Masaka Moisés dorederosũta irirã, ãgũsãyare pe mojõma buri oparire subu sĩma, Levĩ parãmerã ããrĩturiarãrẽ paíare. Iripoegue Levĩ deyoaburi dupiyuro Melquisedec Abrahãrẽ bokatĩrĩgũ waadi ããrĩmĩ. ãgũ bokatĩrĩmakũ, Abraham ãgũ ãĩdeare pe mojõma buri dukawa pí, subu sĩdi ããrĩmĩ Melquisedere. Levĩ, Abraham parãmi ããrĩdi ããrĩmĩ. ãgũ parãmerã ããrĩturiarãde Abraham parãmerãta ããrĩnerã ããrĩmã. Irasirirã, Abraham Melquisedere sĩdea merã ãgũsãde ãgũrẽ sĩnerã irirosũ ããrĩnerã ããrĩmã. Irasirigũ Melquisedec ãgũsã nemorõ ããrĩdi ããrĩmĩ.

¹¹ Marĩpũ Israel bumarãrẽ ãgũ dorerire pígu, Aarõn parãmerã ããrĩturiarã Levĩya bumarãrẽ: “Paía ããrĩma”, ãrĩ pídi ããrĩmĩ. Irasirirã ãgũ dorederosũta paía waimurãrẽ wẽjẽ soepe, Marĩpũre masakaya ããrĩburire sãrẽbosanerã ããrĩmã. ãgũsã irasiridea gapũ masakare Marĩpũ ãũrõ õãrã waamakũ irimasĩbea. Irasirigũ Marĩpũ ãgũsãrẽ gorawayubure Cristore iriudi ããrĩmĩ, paí ããrĩbure, marĩrẽ õãrã ããrĩmakũ iribure. Cristo gapũ Levĩya bumũ, Aarõn parãmi ããrĩturiagũ ããrĩbemi. Melquisedec ããrĩderosũta paí ããrĩmi. ¹² Irasirigũ Marĩpũ Cristore paíare gorawayubure iriugũ, ãgũ iripoegue doredeadere gorawayudi ããrĩmĩ.

13-14 Marĩpũ ĩgũ iripoegue dorederosũta Levĩya bumarã ditare paía sóounadi ããrĩmĩ. Marĩ Opũ Jesucristo gapũ Israel bumũ ããrĩkeregũ, Levĩya bumũ meta ããrĩmĩ. Judáya bumũ ããrĩmĩ. Marĩpũ Moisere ĩgũ dorerire pígu, neõ Judáya bumarãrẽ: “Paía ããrĩrãkuma”, ãrĩbiridi ããrĩmĩ. Irire masĩa marĩ.

15 Irire masĩrã, idere õãrõ pémasĩa. Cristo, Marĩpũ paí sóodi, gajirã paíare gorawayugũ, Melquisedec irirosũ ããrĩgũ ããrĩmĩ. 16 Marĩpũ iripoegue dorederosũta Levĩya bumarã dita paía ñajãunanerã ããrĩmã. Jesucristo gapũ Marĩpũ pídi gajirã paía irirosũ paí ñajãbiridi ããrĩmĩ. Marĩpũ turari merã ããrĩnĩgũ ããrĩsĩã, paí ñajãdi ããrĩmĩ. 17 Marĩpũ ĩgũ werenĩrĩ gojadea pũgue ĩgũ magũrẽ irire ãsũ ãrĩdi ããrĩmĩ:

Melquisedec paí ããrĩderosũta mũ ããrĩnĩkõãgũkoa, ãrĩdi ããrĩmĩ.✧

18 Marĩpũ Moisere doreri pípuroridea marĩrẽ Marĩpũ merã õãrõ ããrĩmakũ irimasĩbea. Irasirigũ Marĩpũ iri dorerire bojepíkõãdi ããrĩmĩ. 19 Marĩpũ Moisere doreri pídea merã marĩ ĩgũ ĩũrõ õãrã neõ ããrĩmasĩbea. Irasirigũ Marĩpũ Jesucristo merã marĩrẽ õãrã ããrĩmakũ iriburire pídi ããrĩmĩ. Irasirirã marĩ Cristore bũremurã, Marĩpũ pũroque ñajãrã irirosũ ĩgũrẽ diayeta sêrẽmasĩa.

20 Marĩpũ Cristore paí sóogũ: “Yũ wãĩ merã mũrẽ wãĩpeo píã”, ãrĩdi ããrĩmĩ. 21 Gajirã paía gapũre ĩgũ wãĩ merã wãĩpeo píbiridi ããrĩmĩ. Cristo gapũre wãĩpeo, paí pídi ããrĩmĩ. ãsũ ãrĩ weredi ããrĩmĩ Marĩpũ Cristore:

✧ 7:17 Sal 110.4

Yu, mu Opu ããrã. Irasirigu yu wãĩ merã murẽ
wãĩpeogu, diayeta weregura.

Irasirigu neõ gorawayuro marĩrõ murẽ ãsũ ãrĩ
werea: “Melquisedec paĩ ããrĩderosũta mu
ããrĩnikõãgukoa”, ãrĩdi ããrĩmĩ Marĩpu ĩgũ
magũrẽ.✧

²² Marĩpu irasũ ãrĩ weregu, ĩgũ Jesucristo merã
marĩrẽ õãrã ããrĩmakũ iriburire pĩdi ããrĩmĩ. Iri
ĩgũ Moisére doreri pĩpuroridea nemorõ, marĩ
õãrõ ããrĩburire pĩdea ããrã. ²³ ããrĩpurorinerã paía
boamakũ, gajirã gorawayu ñajãnerã ããrĩmã doja.
Irasirirã wárã paía ñajãnanerã ããrĩmã. ²⁴ Jesús
gapu irasũ ããrĩnikõãmi. Irasirirã ĩgũrẽ gorawayurã
paía neõ máma. ²⁵ Irasirigu Marĩpure marĩya
ããrĩburire sêrêbosaníkõãmi. Marĩpure masĩrãno,
Jesúre buremurã ããrĩma. Irasirigu ããrĩpererã
marĩrẽ ĩgũrẽ buremurãrẽ taumasĩmi, Marĩpu merã
õãrõ ããrĩnikõãburo, ãrĩgũ.

²⁶ Irasirigu Jesús paía opu nemorõ, ããrĩpereri
marĩya ããrĩburire keoro iritamugũ ããrĩmi. ĩgũrẽta
marĩ buro gããmea. ĩgũ õãtarigu, neõ ñerĩrẽ iribi,
ñerĩ opabi ããrĩmi. Irasirigu Marĩpu ĩgũrẽ ñerã
watope ããrĩdire ãĩ, ũmugasigue ããrĩpererã gajirã
nemorõ Opu pĩdi ããrĩmĩ. ²⁷ Gajirã paía oparã
irirosũ ããrĩbemi. ĩgũsã gapu ũmuriku waimurãrẽ
wêjẽ soepeo sêrêbosama, Marĩpure masaka ñerĩ iri-
dea waja ĩgũsãrẽ wajamoãbirikõãburo, ãrĩrã. Paíade
ĩgũsã ñerĩ iridea waja Marĩpu ĩũrõ ĩgũsã basi
waimurãrẽ wêjẽ soepeopurorima. Puru gajirã ñerĩ
ĩgũsã iridea waja waimurãrẽ wêjẽ soepeobosama.
ũmuriku irasirinama. Jesús gapu paía opu nemorõ

✧ 7:21 Sal 110.4

ãārĩgú, marĩ ñerĩ iridea waja waimurãrẽ wẽjẽ soepeobiridi ãārĩmí. Suñarõta marĩ ãārĩpererãrẽ boabosadi ãārĩmí, marĩ ñerĩ iridea wajare taugũ. ²⁸ Marĩpũ Moisére doreri pídea merã paía oparã sóosũma. Ígũsã irasũ sóosũkererã, õãrĩ ditare irimerã ãārĩma. Iri dorerire pídero purũ, Marĩpũ ígũ magũ gapure ígũ wãĩ merã wãĩpeo, paía opu nemorõ sóodi ãārĩmí. Irasirigũ ígũrẽ sóogu, ígũ gããmerõsũta õãrĩ iripeogu ãārĩnímakũ iridi ãārĩmí.

8

Jesús maríya ãārĩburire Marĩpũre sërẽbosagu ãārĩmí, ãrĩ gøjadea

¹ ãārĩpereri yũ musãrẽ wererire pérã, ire õãrõ pémasĩka! Jesucristo paía opu nemorõ ãārĩgú ãmugasigue Marĩpũ turatarigũ diaye gapũ doami ígũrẽ maríya ãārĩburire sërẽbosabu. ² Õmugasigue marĩ Opu iridea wii ígũya wiigora ããrã. Iri wii, masaka iridea wii meta ããrã. Irasirigũ Jesucristo irogue maríya ãārĩburire Marĩpũre sërẽbosagu, iri wiigueta sërẽbosami. ³ Marĩpũ i nikũ marã paía oparãrẽ sóogu, ígũ ãũrõ waimurãrẽ wẽjẽ soepeomurãrẽ, gajino ígũrẽ sĩmurãrẽ sóomi. Irasirigũ Jesucristode ígũsã Marĩpũre gajino sĩrã irirosũ irigũ, ígũ basi marĩrẽ boabosadi ãārĩmí. ⁴ Jesucristo i nikũgue ãārĩgú, paí ãārĩbiribukumi. Gajirã paía Moisés dorederosũta Marĩpũ ãũrõ ígũrẽ gajinorẽ sĩrã ããrĩsiana. ⁵ I nikũ marã paía Marĩpũya wiigugue ígũ ãũrõ moãma. Iri wii i nikũma wii ããrã. Marĩpũya wiigora ãmugasigue ããrã. Irasiro Marĩpũya wii i nikũma wii, ãmugasima wii keori ããrã. Moisés i nikũma wiire iriburo

dupiyuro Marĩpũ ãsũ ãrĩdi ããrĩmĩ ĩgũrẽ: “Yũ mũrẽ ãtãũgue ĩmuderostũta yaa wiire irigũkoa. Yũ dorederosũta yaa wiire keoro irika!” ãrĩdi ããrĩmĩ. ⁶ Jesús gapũre: “Paía opũ nemorõ ããrã mũ”, ãrĩ pídi ããrĩmĩ. Irasiro Jesús ãmũgasigue paí moãrĩ, i nikũ marã paía moãrĩ nemorõ õãrĩ ããrã. Iripoegue Marĩpũ masakare: “Moisére yũ doreri pídeare iripeorãrẽ õãrõ irigũra”, ãrĩ werepídi ããrĩmĩ. Pũrũ Jesucristore iriugũ: “Īgũrẽ bũremurãrẽ yũ merã õãrã ããrĩmakũ irigũra”, ãrĩ werepídi ããrĩmĩ. Irasiro ĩgũ iripoegue werepídea nemorõ õãrĩ ããrã. Irasirigũ Jesucristo Marĩpũ merã marĩ õãrõ ããrĩburire ãmubosagũ ããrĩsĩã, paía opũ nemorõ ããrĩmĩ.

⁷ Moisére Marĩpũ doreri pídea, marĩrẽ Marĩpũ merã õãrõ ããrĩmakũ iribiridero ããrĩbũ. Iri doreri marĩrẽ õãrõ irimakũ tamerãrẽ Marĩpũ dupaturi gajĩ werepĩbiribodi ããrĩmĩ. ⁸ Īgũyarã, Israel bumarã ĩgũ doredeare iribiri waja ĩgũsãrẽ ãsũ ãrĩdi ããrĩmĩ ĩgũya werenĩrĩ gojadea pũgue:

Yũ mũsã Opũ, ãsũ ãrã: “Õãrõ péka! Mũsã Israel bumarãrẽ, Judáya bumarãdere pũrũguere gajĩ maama werepĩgũkoa.

⁹ Iri, yũ mũsã ñekũsãmarãrẽ iripoegue werepídea irirosũ neõ ããrĩbirikoa. Yũ basi ĩgũsãrẽ Egipto nikũgue ããrĩrãrẽ õãrõ koreri merã wiubũ. Wiu: ‘Yũ dorerire irimakũ, mũsãrẽ õãrõ irigũra’, ãrĩ werepĩbũ. Yũ irasũ ãrĩdeare ĩgũsã gapũ tarinũgãma. Īgũsã tarinũgãrĩ waja ĩgũsãrẽ béobũ, ĩgũsã gããmerõ iriburo, ãrĩgũ.

¹⁰ Irasirigũ pũrũguere Israel bumarãrẽ ãsũ

ãrĩ weregura: Y_u dorerire ãgūsãrẽ gũña pémãsĩmakũ irigũkoa. Y_u dorerire ãgūsãrẽ iridũamakũ irigũkoa. Irasirigu y_u, ãgūsã Op_u ããrĩgũkoa. ãgūsã, yaarã y_u ditare buremurã ããrĩrãkuma.

11 Neõ sug_u ãgũyarãrẽ ãgũ merãmarãrẽ, ãgũ pagupũrãrẽ: ‘Marĩ Op_ure masĩka m_usã!’ ãrĩ buebirikuma. ããrĩpererã y_ure masĩrãkuma. Majĩrã, irasũ ããrĩmakũ m_urã y_ure masĩrã dita ããrĩrãkuma.

12 Irasirigu ãgūsã ñerĩ irideare kãtigũkoa. ãgūsã ñerĩ irideare neõ gũñanemobirikoa. ãgūsãrẽ wajamoãbirikoa”, ãrĩdi ããrĩmĩ Marĩp_u Israel bumarãrẽ.✧

13 Irasũ ãrĩ wereg_u, maama werepĩri merã iripoegue ãgũ masakare werepĩp_urorideare peremakũ iridi ããrĩmĩ. Gajino bug_ure béo gorawayurosũ, maama merã ãgũ werepĩp_urorideare gorawayudi ããrĩmĩ.

9

Marĩp_ure buremurĩ wiimarẽ gojadea

¹ Iriipoegue Marĩp_u Moisére ãgũ dorerire pĩp_urorigu, masaka ãgũrẽ buremuburidere pĩdi ããrĩmĩ. Irasirigu ãgūsãrẽ ãgũrẽ buremuburi wii i nikũma wiire iridoredi ããrĩmĩ. ² Iri wii waim_urã gasiri merã ãgūsã iridea wii, pe taribu opari wii ããrĩdero ããrĩbá. Ñajãnugãp_uroriri taribu Marĩp_uya taribu wãĩk_udero ããrĩbá. Iri taribure sãg_uri yuk_u peodi, irasũ ããrĩmakũ baari peyaro ããrĩdero ããrĩbá. Iri peyaro weka Marĩp_u iũrõ pã

✧ 8:12 Jer 31.31-34

duparu peyadero ããrĩbú. ³ Iri taribu korema taribu surĩro gasiro merã kãmutadea taribu ããrĩdero ããrĩbú. Iri taribu Marĩpũ ããrĩrĩ taribugora wãikũdero ããrĩbú. ⁴ Iri taribugue ñajãrõ puro sũrõrĩ soemurõ oro merã iridero ããrĩdero ããrĩbú. Iri taribu poekague oro merã õmabiadea kũma, Marĩpũ ãgũ doreri gojadea ãtã majĩrĩ opari kũma ããrĩdero ããrĩbú. Gaji soro oro merã iridea soro Marĩpũ masakare ejodea maná wãikũri poga oparisoro, irasũ ããrĩmakũ Aarõyagũ tuadi ñasãtuadi iri kũmague ããrĩdero ããrĩbú. ⁵ Marĩpũ iri kũma bũũari majĩ weka pẽrã ãgũrẽ wereboerã kẽdupurikurã keori weadea merã ãgũ iri taribugue ããrĩrĩrẽ ãmudi ããrĩmĩ. ãgũsãya kẽdupuri merã iri kũma bũũari majĩrẽ sẽẽ kãmutadero ããrĩbú. Iri bũũari majĩ, Marĩpũ masakare: “ãgũsã ñerõ iridea waja wajamoãbirikoa”, ãrĩdeare keori ããrĩdero ããrĩbú. Dapagorare ããrĩpereri iri wiimarẽ werenemomasĩbirikoa.

⁶ Iri wiimarẽ ãmu ododero purũ, ãmũrikũ paía ããrĩpuroriri taribure ñajãunanerã ããrĩmã Marĩpũ ãũrõ ãgũsã moãrĩrẽ irirã. ⁷ Paía opu dita gaji taribuguere ñajãunadi ããrĩmĩ. Bojorikũ iri taribuguere suñarõta waimurã díre ãĩ ñajãunadi ããrĩmĩ. Dí marĩrõ neõ ñajãbiridi ããrĩmĩ. ãgũ basi ñerĩ iridea waja, irasũ ããrĩmakũ masaka ãgũsã masĩña marĩrõ ñerõ iridea waja iri díre ãĩ ñajãdi ããrĩmĩ, Marĩpũre: “Wajamoãbirikõãka guare! Gua ñerõ irideare kãtika!” ãrĩ sërẽgũ. ⁸ I ããrĩpereri merã Õãgũ deyomarĩgũ marĩrẽ ire pẽmasĩmakũ yãmi. Iri wii ããrĩdeapoe masaka Marĩpũre buremurã, ãgũ ããrĩrĩ taribugue ñajãbirinerã ããrĩmã. ⁹ I ããrĩpereri

Marĩpũ ĩgũrẽ bũremurĩ wiimarẽ pídeare marĩ buesiã: “Dapagoraguere marĩ ĩgũrẽ bũremurĩ ãsũ ãrĩduaro yáa”, ãrĩ pémasĩa. Iro dupiyuro paía gajino Marĩpũre sĩrĩ, waimurãrẽ wějẽ soepeori, masakare: “Marĩpũ ĩũrõ waja opamerã ããrã gũa”, neõ ãrĩ masĩmakũ iribiridero ããrĩbũ. ¹⁰ ãsũ ããrã. Marĩpũ Moisére doreri pídea ĩgũ masakare baadoreri, iiridoreri, ĩgũ ĩũrõ koedoreri dita ããrã. ĩgũsãya yũjũpũrãrĩma ããrĩbea. Irasiro iri doreri marĩrẽ õãrõ waamakũ iribea. Marĩpũ iri dorerire masaka ĩgũsã iriburire pídi ããrĩmĩ. Irire Jesucristo merã gorawayuburo dupiyuro pídi ããrĩmĩ.

¹¹ Cristo gapũ paía opũ nemorõ ããrĩgũ aarisiadi ããrĩmĩ. Irasirigũ ĩgũ boadea merã marĩrẽ õãrõ iridi ããrĩmĩ. Marĩpũ ĩũrõ marĩ ñerĩ iridea wajare peredoregũ, Marĩpũ ããrĩrõgue ãmũgasima wiigũe ñajãdi ããrĩmĩ. I nikũma wiire ñajãbiridi ããrĩmĩ. Ñmũgasima wii, i nikũma wii nemorõ õãtariri wii, masaka iridea wii meta ããrã. ¹² Irasirigũ Cristo, Marĩpũ ããrĩrõgue ãmũgasima wiigũe suñarõta ñajãdi ããrĩmĩ. Iroguẽ ñajãgũ, paía oparã i nikũma wiigũe Marĩpũ ããrĩrĩ taribuguere cabraya díre, wekũa majĩrãya díre ãĩ ñajãderosũ ãĩ ñajãbiridi ããrĩmĩ. ĩgũ basi marĩ ñerĩ iridea waja boagũ, ĩgũya dí merã Marĩpũ ããrĩrõgue ñajãdi ããrĩmĩ, marĩrẽ Marĩpũ merã õãrõ ããrĩnikõãburo, ãrĩgũ. ¹³ Paía oparã cabraya, wekũaya dí merã, wekũgo majĩgõrẽ ĩgũsã soedea nitĩ merã masakare ĩgũsã ñerĩ iridea waja Marĩpũya wiigũe ñajãmasĩmerãrẽ wẽãsiripeoma. ĩgũsãrẽ wẽãsiripeomakũ, Marĩpũ ĩũrõ ñerĩrẽ opamerã duja, Marĩpũya wiigũe dupaturi ñajãmasĩma doja. ¹⁴ Paía oparã wekũaya

dí merã, cabraya dí merã masakare iritamuma. Cristo gapu ïgũsã nemorõ ïgũya dí merã marĩrẽ õãrõ iritamutarigu yámi. ïgũ ñerĩ marĩgũ, Õãgũ deyomarĩgũ ããrĩnĩgũ iritamurĩ merã ïgũ basi Marĩpũre wiadi ããrĩmĩ curusague boabu. Paía waimũrã Marĩpũre wia, ïgũ ïũrõrẽ soepeorosũ ïgũ basi irasũ wiadi ããrĩmĩ. Irasirigu marĩrẽ Marĩpũ merã neõ õãrõ ããrĩbonerãrẽ taudi ããrĩmĩ, Marĩpũ okanĩgũ dorerire õãrõ irimasĩburo, ãrĩgũ. Irasirigu marĩ gũñarĩgue: “Marĩpũ gũare wajamoãgũkumi gũa ñerõ iridea waja”, ãrĩ gũñarĩkũnemobirimakũ iridi ããrĩmĩ.

¹⁵ Irasirigu Jesucristo, Marĩpũ ïgũ beyenerãrẽ maama werepĩderosũta iridi ããrĩmĩ marĩrẽ taubu. Marĩrẽ taugu, Marĩpũyarã ïgũ merã õãrõ ããrĩnĩmakũ iridi ããrĩmĩ. Irasirirã Marĩpũ ïgũyarãrẽ sĩburire oparãkoa. Moisés doreri dita ããrĩmakũ, marĩ ñerĩ iridea waja, waja oparã dita ããrĩbukoa dapa. Cristo marĩrẽ curusague boabosadi ããrĩmĩ, marĩ ñerĩ iridea waja, waja opabonerãrẽ taubu. ¹⁶⁻¹⁷ Æsũ ããrã. Sugũ masakũ ïgũ boaburo dupiyuro ïgũyarãrẽ: “Yũ opari mũsãrẽ dujarokoa”, ãrĩkumi. Irasirigu ïgũ boaburo dupiyuro sĩbirikumi dapa. ïgũ boadero pũrũ, ïgũyarãrẽ: “Mũsãrẽ dujarokoa”, ãrĩderosũta ïgũ opadeare ãĩkuma.

¹⁸ Irasiro Marĩpũ masakare: “Æsũ irigura”, ãrĩ werepĩpũroridea, waimũrãrẽ wẽjẽ, ïgũsãya dí béoro marĩrõ wajamarĩdero ããrĩbũ. Waimũrãrẽ wẽjẽ, ïgũsãya díre béodero pũrũ, Marĩpũ dorerire diayeta irinerã ããrĩmã. ¹⁹ Irasirigu Moisés, Marĩpũ ïgũ doreri pĩdeare masakare werepeodi ããrĩmĩ. Pũrũ cabraya díre, wekũa majĩrãya díre deko merã

morēdi āārīmí. Morē odo, hisopo wāīkūdi d̄up̄u merā oveja poarire diari merā ñimudea merā tūrādi āārīmí. Iri d̄up̄u merā díre yosa, Marīp̄u dorerire ĩgū gojadea pū weka, āārīpererā masaka wekadere wēāsiripeodi āārīmí. ²⁰ P̄ur̄u ĩgūsārē āsū ārīdi āārīmí: “Marīp̄u marīrē ĩgū doreri pídea, i dí merā diaye āārīmakū masīa. I díre ĩārā, diayeta ĩgū ārīderosūta ĩgū marīrē iriburire masīa. Irasiriḡu Marīp̄u: ‘Ȳu dorerire ōārō irika!’ ārīmi”, ārīdi āārīmí Moisés. ²¹ P̄ur̄u masakare ĩgū iriderosūta Marīp̄ure b̄uremurī wii wiamurā gasiri merā ĩgūsā iridea wiire, āārīpereri iri wiigue āārīrdere wēāsiripeodi āārīmí. ²² Āsū āārā. ĩgū dorederosūta Marīp̄ure b̄uremurī wiimarē dí merā wēāsirimakū, Marīp̄u irire: “Ȳu ĩūrō ōārī āārā”, ārī ĩādi āārīmí. Irasū wēāsiribirimakū: “Ōārī āārā”, ārī ĩābiribodi āārīmí. Irasiriḡu dí béoro marīrō, marī ñerī iridea wajare marīrē kātimasībirikumi.

Jesucristo, ĩgū boari merā marī ñerō iridea wajare taudi āārīmí, ārī gojadea

²³ Irasirirā i nikūma wiire, iri wiigue āārīrdere paía: “Marīp̄u ĩūrō ōārī āārā”, ārīrā, waimurā dí merā wēāsiripeonerā āārīmá. I nikūma wii, ūmugasima wii keori dita āārīdero āārībú. Irasiriro ūmugasima wiire, iri wiigue āārīrdere: “Marīp̄u ĩūrō ōārī dita āārā”, ārī, waimurā dí nemorō Cristoya dí merā wēāsiripeoro gāamea. ²⁴ Irasiriḡu Cristo marīya āārīburire Marīp̄ure sērēbosagu, Marīp̄ure b̄uremurī wii masaka iridea wiire ñajābiridi āārīmí. Iri wii, ūmugasima wii keori āārīdero āārībú. Marīp̄uya wiigora ūmugasigue

ããrã. Irasirigũ Cristo ãmũgasima wiigue ñajãdi ããrĩmĩ, Marĩpũ iũrõ marĩya ããrĩburire sërëbosabu.

²⁵ Bojorikũ sugũ paía opũ i nikũma wiigue, Marĩpũ ããrĩrĩ taribugue waimũrã dí merã ñajãnadi ããrĩmĩ. Cristo gapũ marĩrẽ boabosagu, suñarõta ãmũgasima wiigue, Marĩpũ ããrĩrõgue ãgũya dí merã ñajãdi ããrĩmĩ. ²⁶ Paía opũ dí merã ñajãnaderosũ irigũ, i ãmũ ããrĩnũgãdeapoeguetã boa, masãdi tamerã irasũta boa, masãnikõãbodi ããrĩmĩ. Suñarõta i ãmũ pererĩnũ ejaburi dupiyuro i nikũguere deyoadi ããrĩmĩ, ãgũ suñarõta boari merã marĩ ããrĩpererã ñerĩ iridea wajare béobu. ²⁷ ããrĩpererã marĩde suñarõta boarãkoa. Marĩ boadero pũrũ, Marĩpũ ãgũ iũrõrẽ marĩrẽ nídozegũkumi ãgũrẽ bũremurãrẽ õãrõ iri, ãgũrẽ bũremubirinerãrẽ wajamoãbu. ²⁸ Marĩ suñarõta boarosũ, Cristode suñarõta boadi ããrĩmĩ. Irasirigũ ãgũ boari merã wãrã masaka ñerõ iridea wajare béobosadi ããrĩmĩ. Irasiri odo, ãmũgasigue mũrĩa, pũrũ i nikũgue dupaturi aarigũkumi doja. Irasũ aarigũ, masaka ñerõ iridea wajare béogũ aarigũ meta irigũkumi. ãgũrẽ usũyari merã yũrãrẽ taugũ aarigũkumi, ãmũgasigue ãgũ merã ããrĩburo, ãrĩgũ.

10

¹ Marĩpũ Moisére ãgũ doreri pídea, pũrũgue ãgũ Cristo merã masakare õãrõ iriburi keori dita ããrĩdero ããrĩbũ. Cristo masaka ñerĩ iridea wajare béodi ããrĩmĩ. Marĩpũ Moisére doreri pídea gapũ ãgũsã ñerĩ iridea wajare béomakũ irimasĩbiridero ããrĩbũ. Irasiriro iri dorederosũta paía bojorikũ Marĩpũ iũrõ waimũrãrẽ wẽjẽ soepeorire irinakeremakũ, masaka ñerĩ iridea

wajare béomakū irimasībiridero āārībú. Īgūsārē Marīp̄ũ iūrō ōārā āārīmakū irimasībiridero āārībú. ² Iri doreri masakare ōārā āārīmakū irimasīmakū, suñarōta waimurā wējē soepeori merāta Īgūsā ñerī iridea wajare béosūbonerā āārīmá. “Waja opamerā āārā”, ārī gūñabonerā āārīmá. Irasirirā, Marīp̄ũ iūrō Īgūsā waimurā wējē soepeorire pirikōābonerā āārīmá. ³ Āsū gap̄ũ āārīdero āārībú. Marīp̄ũ, bojorikū Īgūsā waimurārē wējē soepeodea merā Īgūsā ñerō irideare gūñamakū iridi āārīmí. ⁴ Irasirirā wek̄uaya dí, cabraya dí merā marī ñerī iridea wajare neō béomasībea.

⁵ Irasiriḡũ Cristo i nikūguere aariburo dupiyuro Īgū Pagure āsū ārīdi āārīmí:

M̄ũ iūrō Īgūsā waimurārē wējē soepeorire, gajino Īgūsā murē sīrīdere gāāmebea. Irasiriḡũ yure d̄up̄uk̄uḡũ deyoamakū iriḡukoa, Īgūsā ñerō iridea waja Īgūsārē boabosadoreḡũ.

⁶ Masaka Īgūsā ñerō irideare kātidoreduarā, m̄ũ iūrō Īgūsā waimurārē wējē soepeorire, gajino Īgūsā murē sīrīdere us̄uyari merā ĩābea.

⁷ Irasiriḡũ ȳũ āsū ārīb̄ũ: “M̄ũ, ȳũ Op̄ũ āārā. Irasiriḡũ m̄uya werenírī gojadea pūgue gojaderosūta m̄ũ gāāmerīrē iriḡũ waagura”, ārīdi āārīmí Cristo Īgū Pagure.✧

⁸ Irire ārīḡũ, ire ārīp̄ũroridi āārīmí Marīp̄ũre: “M̄ũ iūrō Īgūsā waimurārē wējē soepeorire, gajino Īgūsā murē sīrīdere gāāmebea. Īgūsā irasū iririre us̄uyari merā ĩābea”, ārīdi āārīmí Marīp̄ũ dorederosū Īgūsā irikeremakū. ⁹ P̄ũũ āsū ārīnmodi āārīmí: “M̄ũ, ȳũ Op̄ũ āārā. Irasiriḡũ m̄ũ gāāmerīrē iriḡũ waagura”,

✧ 10:7 Sal 40.6-8

ãrĩdi ããrĩmĩ. Irasirigũ Marĩpũ ãgũ masakare waimũrãrẽ wẽjẽ soepeodoredeare bẽodi ããrĩmĩ. Irire bẽogũ: “Cristo boari merã gapũ masakare ãgũsã ñerĩ iridea wajare taugũra”, ãrĩ werepĩdi ããrĩmĩ. ¹⁰ Jesucristo, Marĩpũ gããmederosũta ãgũ basita Marĩpũre wiadi ããrĩmĩ, marĩ ããrĩpererãrẽ suñarõta boabosagũ. Irasirigũ ãgũ boari merã Marĩpũ marĩrẽ ãgũyarã õãrã, waja opamerã ããrĩmakũ iridi ããrĩmĩ.

¹¹ ããrĩpererinũrĩ Marĩpũ iũrõ judío masaka paía waimũrãrẽ wẽjẽ soepeonĩkõãma. Irasirikeremakũ, marĩ ñerĩ iridea wajare neõ bẽomakũ irimasĩbea.

¹² Jesucristo gapũ suñarõta marĩrẽ boabosadi ããrĩmĩ, marĩ ñerĩ iridea wajare bẽobu. Irire irasiri odo, ãmũgasigue Marĩpũ diaye gapũ doadi ããrĩmĩ marĩ Opũ ããrĩgũ. ¹³ Iroguere doagũ, ãgũrẽ ãaturirãrẽ Marĩpũ tarĩnũgãbosaburire yũgũ yãmi.

¹⁴ ãgũta suñarõta boari merã ãgũyarãrẽ õãrã, waja opamerã ããrĩnĩmakũ iridi ããrĩmĩ. ¹⁵ Jesucristo irasũ irideare Õãgũ deyomarĩgũ marĩrẽ: “Irasũta ããrã”, ãrĩ masĩmakũ yãmi. ãsũ ãrĩ weredi ããrĩmĩ:

¹⁶ Mũsã Opũ ãsũ ãrĩmĩ: “Pũrũguere yaarãrẽ ãsũ ãrĩ weregũra: ‘Yũ dorerire ãgũsãrẽ iridũamakũ irigũkoa. Yũ dorerire gũña pẽmasĩmakũ irigũkoa’ ”.✧

¹⁷ Idere ãrĩnemomi: “ãgũsã ñerõ irideare dupaturi neõ gũñanemobirikoa”, ãrĩmĩ, ãrĩ weredi ããrĩmĩ Õãgũ deyomarĩgũ.✧

¹⁸ Irasirirã marĩ ñerĩ irideare Marĩpũ kãtisũnerã ããrã. Dupaturi marĩ ñerĩ iridea wajare waimũrã wẽjẽ soepeorire gããmenemobea.

✧ 10:16 Jer 31.33 ✧ 10:17 Jer 31.34

Marĩpũ ããrĩrõgue ñajãrã irirosũ marĩya ããrĩburire ãgũrẽ sërẽrõ gããmea, ãrĩ gojadea

19 Irasirirã dapagorare marĩ ãmũgasigue Marĩpũya wiigue ãgũ ããrĩrĩ taribugorague ñajãrã irirosũ gũiro marĩrõ ãgũrẽ diaye sërẽmasĩa. Jesucristo marĩrẽ boabosagũ dí béodea merã irasirimasĩa. 20 Jesucristo boaburi dupiyuro Marĩpũ ããrĩrĩ taribugoraguere paía opũ dita iri taribu makãpũro kãmutari gasirore tariñajãdi ããrĩmĩ, masakaya ããrĩburire Marĩpũre sërẽbosabu. Jesucristo gapũ ãgũ boadea merã Marĩpũ merã marĩ õãrõ ããrĩrĩrẽ kãmutadeare béodi ããrĩmĩ. Irasirirã dapagorare marĩ Jesucristo marĩrẽ boabosadea merã Marĩpũ ããrĩrõguere ñajãrã irirosũ marĩya ããrĩburire Marĩpũre diaye sërẽmasĩa.

21 Jesucristo paía opũ nemorõ paí ããrĩgũ Marĩpũ ããrĩrõgue marĩya ããrĩburire sërẽbosagũ ããrĩmĩ. Irogue ãgũ marĩrẽ Marĩpũyarãrẽ õãrõ doregũ ããrĩmĩ. 22 Irasirirã diaye gũñarĩ merã, bũremurĩrẽ neõ piriro marĩrõ merã Marĩpũ ããrĩrõgue ñajãrã irirosũ marĩ ãgũrẽ diaye sërẽrõ gããmea. Cristo ãgũ boadea merã marĩrẽ waja opamerã ããrĩmakũ iridi ããrĩmĩ: “Ñerĩ iridea waja, waja oparã ããrã gũã”, ãrĩ neõ gũñarikũnemobirikõãburo, ãrĩgũ. Irasirirã gurari marĩrĩ deko merã marĩya dupũre túkoenerã irirosũ Marĩpũ iũrõ õãrã ããrã. 23 Marĩpũ marĩrẽ: “Taugũra”, ãrĩderosũta irigũkumi. Irasirirã marĩrẽ ãgũ ãrĩdeare bũremupũroriderosũta piriro marĩrõ õãrõ ãsũyari merã bũremuwãgãnikõãrã! 24 Gajirã Jesúre bũremurãdere gũñarã! Irasirirã gãme iritamurã! Gãme maĩrĩ merã õãrõ irirã! 25 Piriro marĩrõ merã Marĩpũyare nerẽ buerã! Surãyeri marĩ merã nerẽ buemerã irirosũ iribirikõãrã!

Marĩ Opũ i nikũguere dupaturi aariburo mérõ dũyáa. Irasirirã irire masĩrã, gãme iritamurõ gãamea ĩgũrẽ bũremunemomurã.

²⁶ Marĩpũ marĩrẽ Jesúya kerere: “Diayeta ããrã”, ãrĩ masĩmakũ iridero pũrũ, marĩ ñerĩ iridũarire piriro marĩrõ iriwãgãnikõãrã, marĩ ñerõ iridea waja Jesucristo ĩgũ boadea merã marĩrẽ taudeare béobukoa. Irire béomakũ, dupaturi ĩgũ marĩrẽ boabosari neõ máa. ²⁷ Marĩ ĩgũ taudeare béomakũ ĩãgũ, Marĩpũ ããrĩpererã ĩgũrẽ ĩãturirãrẽ bũro wajamoãgũ, marĩdere ĩgũsã merã perebiri peamegue béogũkumi. Irasirirã marĩrẽ gajirã ĩgũyare béonerã merã ĩgũ wajamoãburire bũro gũiri merã ããrĩbukoa. ²⁸ Iripoegue marã Moisés dorerire tarinũgãgũrẽ wajamoãnerã ããrĩmá. ĩgũ ñerõ irideare pẽrã, o Ʃrerã ĩã, ĩgũrẽ weresãdero pũrũ, Marĩpũ dorederosũta neõ bopoñarĩ merã ĩãrõ marĩrõ ĩgũrẽ wẽjẽnerã ããrĩmá. ²⁹ ¿Naásũ gũñarĩ mũsã? ĩgũrẽ wajamoãdero nemorõ Marĩpũ magũrẽ ĩãturigũnorẽ bũro wajamoãgũkumi. ĩgũ magũya dí béodea merã Marĩpũ marĩrẽ: “Õãrã, waja opamerã ããrĩma”, ãrĩ ĩãdi ããrĩmĩ. Iripoegue irire werepidi ããrĩmĩ. Irasirigũ Jesucristoya dí béodeare: “Wajamáa”, ãrĩrãrẽ, Õãgũ deyomarĩgũrẽ Marĩpũ marĩrẽ maĩrĩrẽ masĩmakũ irigũre ñerõ werenĩrãrẽ bũro wajamoãgũkumi. ³⁰ Marĩ Opũ ãrĩdeare masĩa marĩ. Ásũ ãrĩdi ããrĩmĩ: “Yũ ããrã, waja oparãrẽ wajamoãbu. ĩgũsã ñerĩ iridea waja ĩgũsãrẽ wajamoãgũrã”, ãrĩdi ããrĩmĩ. Ásũ ãrĩnemodi ããrĩmĩ doja: “Yarã iririre ĩãgũ, ĩgũsãrẽ diayemarẽ irigũrã”, ãrĩdi ããrĩmĩ. ³¹ Marĩpũ okanĩgũ masakare

wajamoãrĩ buro goeri ããrã.

³² Mũsã iripogue ããrĩdeare gũñaka! Marĩpu mũsãrẽ Jesucristoya kerere masĩngãmakũ iridero puru, gajirã mũsãrẽ ñerõ tarimakũ irinerã ããrĩmã. Irasirikeremakũ, mũsã gapu ãgũrẽ buremurĩrẽ neõ piribirinerã ããrĩbũ. ³³ Masaka ãũrõ gajirã surãyeri mũsãrẽ ñerõ werení, ñerõ iribiranerã ããrĩmã. Gajipoe mũsã merãmarãrẽ gajirã ñerõ iribiramakũ ããrã, ãgũsãrẽ béobiri, mũsãde ãgũsã merã ñerõ iribirasũnerã ããrĩbũ. ³⁴ Surãyeri mũsã merãmarã peresugue ããrĩmakũ ããrã, bopoñarĩ merã ãã, ãgũsãrẽ iritamunerã ããrĩbũ. Gajirã mũsãyare ãmakeremakũ, mũsãyari merã: “Õãrokoa”, ãrĩnerã ããrĩbũ. I nikũma nemorõ õãrĩ perebiriburire ãmagasiguere mũsã opaburire masĩnerã ããrĩbũ. Irasirirã mũsã oparire ãgũsã ãmamakũ, bujawerebirinerã ããrĩbũ. ³⁵ Irasirirã Jesucristore gũñaturaníkõãka! ãgũrẽ buremurĩrẽ neõ piribirikõãka! ãgũrẽ buremurã, wãri õãrĩrẽ wajatarãkoa. ³⁶ Mũsãrẽ õãrõ gũñaturari merã Marĩpu gããmerĩrẽ iriníkõãrõ gããmea. Irasirirã, ãgũ: “Õãrĩrẽ sũgura”, ãrĩdeare oparãkoa. ³⁷ Marĩpu ãsũ ãrĩdi ããrĩmĩ ãgũya werenĩrĩ gojadea pũgue:

Mérõ dũyãa yu iriudi i ãmũguere dupaturi aariburo. Yooboro marĩrõ ejagũkumi.

³⁸ ãgũrẽ buremurãrẽ: “Õãrõ irirã, yaarã ããrĩma”, ãrĩ ãã. Yu merã ããrĩnókõãrãkuma. ãgũrẽ buremurĩrẽ pirirã gapure suyubirikoa, ãrĩdi ããrĩmĩ Marĩpu.✧

³⁹ Marĩ gapu ãgũrẽ buremurĩrẽ pirirã irirosũ ããrĩbea. Irasirirã perebiri peamegue waamurã

✧ 10:38 Hab 2.3-4

ãārĩbea. Marĩ Jesucristore b̄remua. Irasirirã ĩgũ taunerã, ĩgũ p̄ro waamurã ããrã.

11

Marĩp̄re b̄remurĩmarẽ gojadea

¹ Marĩp̄re b̄remurã: “Īgũ marĩrẽ: ‘Ōãrĩrẽ s̄gura’, ãrĩdeare diayeta s̄gukumi”, ãrĩ b̄remua. Irire ĩãbirikererã, ĩãrã irirosũ: “Diayeta ããrã, ĩgũ ãrĩdeare oparãkoa”, ãrĩ b̄remua. ² Iripoeguere marĩ ñekũsãmarã ĩgũrẽ b̄remumakũ, ĩgũsãrẽ: “Ōãrã ããrĩma”, ãrĩ ĩãdi ããrĩmĩ.

³ Marĩp̄re b̄remurĩ merã: “Īgũ werenĩrĩ merã i ãm̄ma ããrĩpereri ããrĩmakũ iridi ããrĩmĩ. Irasirigũ iro dupiyuro neõ marĩdeare i ãm̄marẽ ããrĩpereri marĩ dapagora ĩãrĩrẽ iridi ããrĩmĩ”, ãrĩ masĩa.

⁴ Iripoeguem̄ Abel Marĩp̄re b̄remusĩã, ĩgũ ĩũrõ oveja majĩgũrẽ wẽjẽ soepeogũ, ĩgũ t̄gũ Caĩn s̄dea nemorõ s̄di ããrĩmĩ. Marĩp̄, Abel ĩgũrẽ b̄remurĩrẽ ĩãgũ, ĩgũ s̄deare: “Ōãgorãã”, ãrĩdi ããrĩmĩ. Irasirigũ ĩgũrẽ: “Ōãgũ ããrĩmĩ”, ãrĩ ĩãdi ããrĩmĩ. Abel iripoegue boadi ããrĩkeremakũ, ĩgũ Marĩp̄re b̄remurĩ merã irideare marĩde gũñãã. Irasirirã ĩgũ b̄remuderosũta marĩdere Marĩp̄re b̄remurõ gããmea.

⁵ Enoc Marĩp̄re b̄remusĩã, boabiridi ããrĩmĩ. Īgũ boabirikeremakũ, Marĩp̄ ĩgũrẽ ãĩm̄rĩãkõãdi ããrĩmĩ. Masaka ĩgũrẽ ãmakererã, neõ bokabirinerã ããrĩmã. Marĩp̄ya werenĩrĩ gojadea p̄gue ãsũ ãrĩ gojasũdero ããrĩbũ: “Marĩp̄ Enorẽ ãĩm̄rĩaburi dupiyuro ãs̄yari merã ĩãdi ããrĩmĩ”. ⁶ Marĩp̄re marĩ b̄remumerã ĩgũrẽ ãs̄yamakũ irimasĩbea. Īgũrẽ s̄rẽgũno: “Diayeta ĩgũ Marĩp̄gora ããrĩmĩ”,

ãrĩ gũñarõ gããmea. “Marĩ ãgũrẽ bũremurĩ merã sêrêrĩrẽ õãrõ pémi”, ãrĩ gũñarõ gããmea. Marĩ irire gũñamerã ãgũrẽ sêrêmasĩbea.

⁷ Noé Marĩpũre bũremusĩã, Marĩpũ ãgũrẽ: “Mũ neõ ããbiridea merã i nikũ marãrẽ ãgũsã yũre bũremubiri waja bũro wajamoãgũra”, ãrĩdeare bũremudi ããrĩmĩ. Irasirigũ, Marĩpũ dorederosũta wãdiru doódiru iridi ããrĩmĩ, ãgũyarã merã dia mirĩburire taribu. Marĩpũre bũremusĩã, i nikũ marãrẽ ãgũsã ãgũrẽ bũremubirire masĩmakũ iridi ããrĩmĩ. Marĩpũ, ãgũrẽ bũremumakũ: “Õãgũ ããrĩmĩ”, ãrĩ ããdi ããrĩmĩ.

⁸ Abraham Marĩpũre bũremusĩã: “Gaji nikũ yũ murẽ sĩburi nikũgue waaka!” ãrĩmakũ pégu, ãgũrẽ yũjũdi ããrĩmĩ. “Irogue waagũ irikoa”, ãrĩmasĩbirikeregu, ãgũya nikũrẽ wiriwãgãdi ããrĩmĩ.

⁹ Marĩpũ ãgũrẽ: “Iri nikũrẽ sĩgũra”, ãrĩdeare bũremugũ, iri nikũgue eja, ããrĩmejãjadi ããrĩmĩ. Iro ããrĩmejãjakeregu, gaji nikũmũ irirosũ surĩ gasiri merã iridea wiiri merã naaunadi ããrĩmĩ mũrãrõ ããrĩbirisĩã. Marĩpũ ãgũ magũ Isaare, ãgũ parãmi Jacore: “Iri nikũrẽ sĩgũra mũsãdere”, ãrĩmakũ, ãgũsãde Abraham irirosũta iri nikũgue naaunanerã ããrĩmã. ¹⁰ Abraham iri nikũrẽ naagũ, makãrĩ iribiridi ããrĩmĩ. Gaji makãgue Marĩpũ ããrĩrĩ makãgue mũmũgasigue ãgũ waaburire yũgu iridi ããrĩmĩ. Iri makã Marĩpũ iridea makã neõ perebiri makã ããrã.

¹¹ Abraham marãpo Sara pũrã marĩdeo Marĩpũre bũremusĩã, búrogora ããrĩkerego: “Marĩpũ ãrĩderosũta yũre irigũkumi”, ãrĩ bũremurĩ merã pũrãkũdeo ããrĩmó. ¹² Irasirigũ Abraham

bugurogora āārīkeregū, Sara merā majīgūrē pūrākūdi āārīmí. Īgū parāmerā āārīturiarā wārā āārīnerā āārímá. Neñukārē, ĩmipa yerire keo bokatiũña marĩō irirosū ĩgūsārē keo bokatiũmasĩña máa.

¹³ Āārĩpererā, Marĩpũ ĩgūsārē: “Sĩgũra”, ārĩdeare neō opamerāgue boanerā āārímá. Irire opabirikererā, gũñaturari merā: “Marĩpũ ĩgū ārĩderosũta pũrugue sĩgũkumi gũare”, ārĩ, ĩgūrē bũremuníkōānerā āārímá. Irasirirā gajirārē: “Gaji nikū marā irirosū i nikūgue naarā dita āārā”, ārĩ werenerā āārímá. ¹⁴ Īgūsā irirosũta irire ārĩrāno, gaji nikū, ĩgūsāya nikū āārĩburire āmarā yáma. Irire oārō masĩa marĩ. ¹⁵ Marĩ ñekūsāmarā: “Gaji nikū marā āārā”, ārĩrā, ĩgūsā béowāgādea nikūrē gũñabirinerā āārímá. Irasū ārĩ gũñarā, goedujáakōābonerā āārímá. ¹⁶ I nikū nemorō ũmugasigue oārĩ nikū gapũre: “Bũro waadũakoa”, ārĩ gũñanerā āārímá. Irasirigũ Marĩpũ ĩgūsā ĩgūrē: “Gũa Opũ āārĩmi”, ārĩmakū pégu, gũyasĩrĩrĩ marĩō: “Īgūsā Opũ āārā”, ārĩdi āārímí. Īgū pũro ĩgūsāya makā āārĩburore āmubosasiadi āārímí.

¹⁷ Marĩpũ Abrahārē: “¿Diayeta yũre bũremugũ yáari?” ārĩ gũñagũ, ĩgūrē: “Yũ ĩũrō mũ magũ Isaare wějē soepeoka!” ārĩdi āārímí. Abraham gapũ Marĩpũre bũremusiā: “Neō yũ magũ sugũ āārĩgūrē wějē soepeobirikoa”, ārĩbiridi āārímí. ¹⁸ Iro dupiyurogue Marĩpũ ĩgūrē: “Mũ magũ Isaac merā mũ parāmerā āārīturiarārē opagũkoa”, ārĩsũdi āārīkeregū, Abraham Marĩpũre: “Yũ magūrē neō wějē soepeobirikoa”, ārĩbiridi āārímí. ¹⁹ Abraham: “Marĩpũ ĩgū turari merā boanerārē masũmasĩsiā,

yu magūrē wējēkeremakū, masūgukumi”, āri gūñadi āārīmí. Irasirigu, Marīpu Abrahārē kāmutaḡu: “Mu magūrē wējēbirikōāka!” ārīdi āārīmí. Irasirirā ire masīa. Abraham Īgū magūrē boadigue masādi irirosū dupaturi opadi āārīmí.

²⁰ Isaac Marīpuḡe b̄remusīā, Īgū pūrā Jacore, Esaúre: “Purugue Marīpu m̄sārē ōārō irigukumi”, ārīdi āārīmí.

²¹ Jacob Marīpuḡe b̄remusīā, Īgū boaburo dupiyurogā Īgū tuadi merā tuawāgānugāja, Marīpuḡe sērē b̄remudi āārīmí. Irasirigu Īgū magū José pūrārē: “Marīpu m̄sārē ōārō iritamuburo”, ārīdi āārīmí.

²² José Marīpuḡe b̄remusīā, Īgū boaburo dupiyurogā Īgū pūrārē āsū āri weredi āārīmí: “Marī parāmerā āārīturiarā Egiptogue āārīrā puḡu wirirākuma”, ārīdi āārīmí. “Irore wirirā, yaa gōārīrē āiaburo, Īgūsā ejari nikūgue yāamurā”, ārīdi āārīmí.

²³ Moisés pagūsāmarā Marīpuḡe b̄remusīā, Moisés deyoadero puḡu, Īgū ōāgū āārīmakū ĩārā, ḡrerā abegora Īgūrē duripīnerā āārīmá. Egipto marā opu: “Israel bumarā majīrā ūmarē wējēburo”, āri doregu āārīdi āārīmí. Moisés pagūsāmarā gapu: “Marīpu marīrē iritamugukumi”, āri gūñarā, iri dorerire gūiri marīrō tarinugānerā āārīmá. ²⁴ Puḡu Moisés Egipto marā opu magō masūdi āārīkeregū, Marīpuḡe b̄remusīā: “Igo magū āārīmí”, Īgūsā ārīmakū péduabiridi āārīmí. ²⁵ Āsū gapu iridūadi āārīmí. Marīpuḡyarā Israel bumarā merā ñerō taridūadi āārīmí. Egipto marā merā wāri opakeregū, Īgūsā merā āārīdūabiridi āārīmí. Īgūsā ñerī iriri gapu

iridubiridi aārīmí. ²⁶ Irasirigū ñerō tarikeregū, Egipto marā opari nemorō Cristo Marīpū iriubuyarā merā ñerō tariburire suyudi aārīmí. Pūrugue Marīpū ĩgūrē ōārīrē sīburire masīgū, ĩgūsā merā ñerō taridubadi aārīmí. ²⁷ Moisés Marīpūre bñremusīā, Egipto marā opū ĩgū merā guamakū ĩāgū: “Marīpū yure iritamugukumi”, ārī, irore aārīdi güiri marīrō wiridi aārīmí. Irasirigū Marīpū deyomarīgūrē ĩāgū irirosū ĩgū: “Marīpū iritamurī merā āsū irigura”, ārīrē neō gorawayuro marīrō iridi aārīmí.

²⁸ Moisés Marīpūre bñremusīā, Israel bumarārē Egiptogūe aārīrārē āīwiuburi dupiyuro pascua wāikuri bosenu iripuroridi aārīmí. Irasirigū Marīpū dorederosūta Moisés Israel bumarārē oveja majīrārē wējēdore, ĩgūsāya dí merā makāpurorire wūkādoredi aārīmí. Irire ĩāgū, Marīpūre wereboegū Egipto marā masā tīrā ũmarē wējēgū, Israel bumarā masā tīrā gapure wējēbiridi aārīmí. ²⁹ Israel bumarā Marīpūre bñremusīā, dia wādiya deko diiadiya deko dukawanugādea maa bojoñajāri maarē taribujanerā aārīmá. ĩgūsā irasū taribujamakū ĩārā, Egipto marā gapū ĩgūsārē tuya taribujanerā, mirī boakōānerā aārīmá.

³⁰ Israel bumarā Marīpūre bñremusīā, Jericó tūroma sārīrōrē ũtā majīrī merā iridea sārīrōrē su mojōma pere gaji mojō peru pērēbejarinurī iri makārē ĩgūsā gāmegorodero purū, iri sārīrō meémejādero aārībú. ³¹ Iro dupiyuro iri makāmo ũma merā ñerō irideo, Rahab wāikugo Marīpūre bñremusīā, Israel bumarā iri makārē ĩadurirā ejarārē iritamudeo aārīmó. Irasirigo iri makā

marã Marĩpũ dorerire tarinũgãrã merã boabirideo ããrĩmó.

³² ¿Ñeénorẽ werenemogũkuri yũ? Gajirã Marĩpũre bũremurã: Gedeón, Barac, Sansón, Jefté, David, Samuel irideare, irasũ ããrĩmakũ Marĩpũya kerere weredupiyunerã irideare weregũ, werepeobiribukoa. ³³ Īgũsã Marĩpũre bũremusĩã, gaji nikũgue ããrĩrĩ makãrĩ marãrẽ gãmewẽjẽ, tarinũgãnerã ããrĩmã. Īgũsãyarã masakare diaye dorenerã ããrĩmã. Marĩpũ: “Mũsãrẽ õãrõ iritamugũra”, ãrĩderosũta Īgũsãrẽ õãrõ iritamudi ããrĩmĩ. Ēõkayea Īgũsãrẽ baabonerãrẽ disirire biamakũ irinerã ããrĩmã. ³⁴ Surãyeri peame bũro asirogue béosũkererã, ũjũbirinerã ããrĩmã. Gajirã, sareri majĩrĩ merã sare wẽjẽdũamakũ, tarinerã ããrĩmã. Turamerã ããrĩkererã, Marĩpũre bũremusĩã, turarã waanerã ããrĩmã. Irasirirã gaji nikũ marã Īgũsãrẽ ĩaturirãrẽ gãmewẽjẽ tarinũgãnerã ããrĩmã. ³⁵ Surãyeri nome Īgũsãyarã boanerãgue dupaturi okamakũ ĩãnerã ããrĩmã.

Gajirã Marĩpũre Īgũsã bũremurĩrẽ piridũabiri waja peresugue bũro ñerõ iribirari merã boanerã ããrĩmã. Īgũsã pũrũgue masã, Marĩpũ merã ũmũgasigue õãrõ ããrĩburire gããmesĩã, Īgũrẽ bũremurĩrẽ piridũabirinerã ããrĩmã. ³⁶ Gajirã Marĩpũre bũremurã, bũridari merã bũro tãrãsũnerã ããrĩmã. Gajirã Īgũsãya guburi, mojõrĩrẽ kõme dari merã sũa, peresugue biadobosũnerã ããrĩmã. ³⁷ Gajirã ũtãyeri merã dea wẽjẽsũnerã ããrĩmã. Gajirã Īgũsãya dupũre wiiriro merã wiritã wẽjẽsũnerã ããrĩmã. Gajirã sareri majĩrĩ merã wẽjẽsũnerã ããrĩmã. Gajirã

guyasĩrĩbodi ããrĩkeregu, ĩgũ purugue usuyaburire masĩsĩã, guyasĩrĩbiridi ããrĩmĩ. Masã mũrĩadero purũ, dorebu Marĩpu diaye gapũ doadi ããrĩmĩ.

³ Irasirirã Jesũs waadeare gũñaka! Ñerã ĩgũrẽ burũ ñerũ tarimakũ irinerã ããrĩmã. Irasirirã musãde ñerũ tarirã, õãrũ yujupũrãkũ, piriro marĩrũ ĩgũrẽ gũñaturanĩkõãka! ⁴ Ñerã ñerĩrẽ iridorerire musã tarinũgãdamakũ ĩãrã, musãrẽ wẽjẽñabema dapa. ⁵ ¿Marĩpu musãrẽ ĩgũ pũrãrẽ weredeare kãtiakõãrĩ? ĩgũya werenĩrĩ gojadea pũgue ãsũ ãrĩdi ããrĩmĩ:

Yũ magũ, yũ mũ Opũ, mũrẽ õãrũ iriburo, ãrĩgũ, wajamoãrĩrẽ pemasĩka! Mũrẽ: “Ñerĩrẽ iropata irika!” ãrĩmakũ pégũ, bũjawerebirikõãka!

⁶ ãsũ ããrã. Yũ maĩrãrẽ: “Ñerĩrẽ irimerãta!” ãrĩ, pũrĩrũ páro irirosũ werea. Yũ pũrã ããrĩpererãrẽ wajamoãa õãrũ iridoregu, ãrĩdi ããrĩmĩ.✧

⁷ Marĩpu musãrẽ wajamoãmakũ ĩãrã, ĩgũrẽ õãrũ yujuka! Sugu pagũ ĩgũ magũ ñerũ irimakũ ĩãgũ, ĩgũrẽ wajamoãkumi. Irasũta Marĩpu, marĩ ñerũ irimakũ ĩãgũ, marĩrẽ ĩgũ pũrãrẽ pũrĩrũ páro irirosũ weregũkumi õãrũ iriburo, ãrĩgũ. ⁸ Marĩpu ããrĩpererã ĩgũ pũrãrẽ ĩgũsã ñerũ iridea waja pũrĩrũ páro irirosũ weremi. ĩgũ werebirimakũ, musã ĩgũ pũrã ããrĩbiribukoa. Pagũ marĩrã, ñerũ irisĩã bokasũnerã irirosũ ããrĩbukoa. ⁹ Marĩ majĩrã ããrĩmakũ, marĩ pagusãmarã marĩ ñerũ iriri waja pũrĩrũ páro irirosũ weremakũ, ĩgũsãrẽ bũremubũ. Irasirirã marĩ pagusãmarãrẽ bũremurĩ merã yujuro nemorũ, Marĩpu mũmũgasigue ããrĩgũrẽ

✧ 12:6 Job 5.17; Pr 3.11-12

buremurĩ merã õãrõ yujuro gããmea. Ìgũrẽ buremurã, Ìgũ merã õãrõ ããrĩrãkoa. ¹⁰ Marĩ ñerõ irimakũ, marĩ pagusãmarã Ìgũsã gããmerõsũ yoabiripoe wajamoãma. Marĩpũ gapũ diayema merã wajamoãmi, marĩrẽ Ìgũ irirosũ õãrã ããrĩmakũ irigũ. ¹¹ Diayeta ããrã. Marĩpũ marĩrẽ wajamoãmakũ, usuyabea. Marĩ bujawerekererã, Ìgũ marĩrẽ wajamoãdero purũ, marĩ Ìgũrẽ õãrõ yujurã, diayema iririre iri, Ìgũ merã siñajãrĩ oparãkoa.

Marĩpũ werenĩrẽ pẽdũabirimakũ goegorãa marĩrẽ, ãrĩ gojadea

¹² Irasirirã musã Marĩpũre buremuturamerã ããrĩbirikõãka! Ìgũrẽ õãrõ gũñaturanemoka! Ìgũyare piriro marĩrõ õãrõ irituyaka! ¹³ Õãrõ diayema irika! Gajirã Marĩpũre gũñaturamerã, musã irasirimakũ ããkũirã, gũñaturari merã Ìgũyare irituyarãkuma.

¹⁴ ããrĩpererã masaka merã gãmekẽãrõ marĩrõ õãrõ ããrĩrikuka! Ñerõ iriro marĩrõ ããrĩka! Ñerĩ marĩrã dita marĩ Opũ Jesucristore ããrãkuma. ¹⁵ Õãrõ pẽmasĩka! Marĩpũ musãrẽ iritamurĩrẽ: “Gããmebirikoa”, ããrĩbirikõãka! Ñerĩ tá puri masã, õãrĩ oteri gapũre poyanorẽrokoa. Musãde ñerĩrẽ irirã, gajirãrẽ poyanorẽrãkoa. Irasirirã ñerĩrẽ iribirikõãka! ¹⁶ Sugu Ìgũ marãpo ããrĩbeo merã, neõ sugo igo marãpũ ããrĩbi merã ñerõ iribirikõãburo. Marĩpũyadere gããmemerã irirosũ neõ ããrĩbirikõãka! Irĩpoeguẽmũ Esã Marĩpũyare gããmebiridi ããrĩmĩ. Ìgũ masã tĩgũ ããrĩsĩã, Ìgũ pagũyare Ìgũ boadero purũ opabu ããrĩkeregũ,

sunu buro uaboa, baari merã ĩgũ pagumurẽ ĩgũ opabodeare gorawayudi aãrĩmĩ. ¹⁷ ĩgũ irasiridero puru waadeare masĩa musã. Esau, ĩgũ pagu ĩgũrẽ: “Yu sĩburi merã õãrõ aãrĩgukoa”, aãrĩburire pẽduakeremakũ, ĩgũ pagu gapu ĩgũrẽ: “Mu pagumurẽ sĩsiabu irire”, aãrĩdi aãrĩmĩ. ĩgũ irasũ aãrĩmakũ pẽgu, Esau buro oreri merã ĩgũ pagure: “Sĩka yure!” aãrĩ sẽrẽkeregũ, ĩgũ pagu ĩgũrẽ sĩmakũ neõ irimasĩbiridi aãrĩmĩ.

¹⁸ Marĩpu ĩgũ dorerire Moisere pĩmakũguere marĩ ñekũsãmarã Israel bumarã Marĩpu aãrĩrõgue ejanugãmakũ goegoradero aãrĩbũ. Dapagorare musã gapure irasũ aãrĩbea. Marĩpu ĩgũ dorerire Moisere pĩgu, Sinaĩ wãĩkũdi ãtãũgue aãrĩdi aãrĩmĩ. Irasiriro irogue ĩgũsã ejanugãburipoe iri ãtãũguere peame buro ãjãrõ, naĩtĩãrõ, ñĩmikãyebori, mirũ buro wẽjãpuro aãrĩdero aãrĩbũ. ¹⁹⁻²⁰ Irogue puridiru buro busumakũ pẽnerã aãrĩmã. Puru Marĩpu ĩgũsãrẽ werenĩmakũ pẽnerã aãrĩmã. Marĩpu goero merã ãsũ aãrĩdi aãrĩmĩ ĩgũsãrẽ: “Iri ãtãũrẽ ñapeorãnorẽ ãtãyeri merã dea wẽjẽka, o sareri majĩ merã sare wẽjẽka!” aãrĩdi aãrĩmĩ. “Waimurãdere irasũta irika!” aãrĩdi aãrĩmĩ. ĩgũ irasũ aãrĩ werenĩmakũ pẽrã, gũiri merã Moisere: “Iropata guare wereburo”, aãrĩ, buro sẽrẽnerã aãrĩmã. ²¹ Moisẽs aãrĩpererire ãtãũguere goero aãrĩrĩrẽ ĩãgũ: “Buro gũiri merã naradagu yãa”, aãrĩdi aãrĩmĩ.

²² Musã gapu iripoegue marã Sinaĩ wãĩkũdi ãtãũgue ejanugãnerã irirosũ aãrĩbea. Ũmugasigue Marĩpu aãrĩrõgue Siõn wãĩkũdi ãtãũgue murĩjarosũ diaye ĩgũ merã werenĩmasĩa. Irogue Marĩpu

okanígüya makã, Jerusalén wãikuri makã ããrã. Iroguere Marĩpũ wereboerã wárãgora ããrĩma. ²³ Īgũsã usũyari merã nerërã, Marĩpũre: “Õãtaria mũ”, ãrĩ bũremuma. Iroguere Marĩpũ pũrãde ãmũgasima gojadea pũgueta Īgũsã wãirẽ gojatúsũnerã nerẽma. Marĩpũ ããrĩpererã iririre: “I gapũ õãa, i gapũ õãbea”, ãrĩ weregũ ããrĩmi. Marĩde Īgũ merã õãrõ ããrã. Irasirirã iroguere marã merã nerërãsũta ããrã. Marĩpũ Īgũsãrẽta ñerĩ opamerã ããrĩmakũ irisiadi ããrĩmĩ. ²⁴ Marĩ Jesúre bũremurã ããrã. Iripoegue Marĩpũ marĩrẽ: “Õãrõ irigũra”, ãrĩ werepĩdi ããrĩmĩ. Īgũ irasũ ãrĩ werepĩderosũta Jesús iridi ããrĩmĩ. Īgũya díre bẽo boadea merã marĩrẽ taudi ããrĩmĩ. Iripoeguemu Abel Īgũya dí bẽodeare ĩãgũ, Marĩpũ Īgũrẽ wẽjẽdire wajamoãdi ããrĩmĩ. Jesucristoya dí bẽodea gapũre ĩãgũ, marĩrẽ waja opamerã ããrĩmakũ iridi ããrĩmĩ. Irasiriro Cristo dí bẽodea, Abel dí bẽodea nemorõ wajakũa.

²⁵ Irasirirã õãrõ pẽmasĩka! Marĩpũyare weregũre pẽdũamerã irirosũ ããrĩbirikõãka! Iripoegue i nikũmũ Moisés Marĩpũyare weremakũ pẽrã, wãrã irire pẽdũabirinerã ããrĩmã. Īgũsã irire pẽdũabiridea waja Marĩpũ Īgũsãrẽ wajamoãdi ããrĩmĩ. Īgũsã nemorõ Cristore pẽdũamerã gapũre bũro wajamoãgũkumi. Cristo ãmũgasiguemu Marĩpũyare weregũ ããrĩmi. ²⁶ Iripoegue Marĩpũ Īgũ dorerire Moisére pĩgũ, Īgũ werenĩrĩ merã nikũ ñomemakũ iridi ããrĩmĩ. Dapagorare ãsũ ãrĩmi: “Sunũ i nikũ ñomemakũ irigũ, suñarõta gajino irinemogũra. I nikũ dita ñomemakũ iribi meta ããrĩgũkoa. Ñmũgasiguedere ñomemakũ irigũra”, ãrĩmi. ²⁷ “Sunũ i nikũ ñomemakũ irigũ, suñarõta

gajino irinemogura”, ãrĩgũ: “Ããrĩpereri yu irideare béogukoa”, ãrĩgũ yámi. Ìgũyarārē doregũ ããrĩrĩ gapure béobirikumi. Irasiriro ìgũ irideare béomakũ, ìgũyarārē doregũ ããrĩrĩ dita dujarokoa. ²⁸ Marĩpu ìgũyarārē dorerogue marĩrē ìgũ merã ããrĩmakũ irigukumi. Irasirirã ìgũyarārē doregũ ããrĩrĩrē béosũbirimakũ ìãrã, Marĩpure: “Mũ merã usuyáa”, ãrĩrõ gããmea. Irasirirã bũremurĩ, goepeyaro merã ìgũyare irituyaro gããmea. Irasũ irirã, marĩ ìgũrē usuyamakũ irirãkoa. ²⁹ Peame ùjũrõ goerosũ Marĩpu goero wajamoãgũ ããrĩmi. Irasirirã ìgũrē goepeyaro merã bũremurã!

13

Marĩpu suyuri ditare iriro gããmea, ãrĩ gojadea

¹ Marĩ Jesucristore bũremurã sugũ pũrã irirosũ ããrã. Irasirirã gãme maĩrĩrē neõ piribirikõãka!

² Musã puro ejarārē õãrõ merã musãya wiirigue ñjãridoreka! Irire kãtibirikõãka! Iripoegue gajirã irasirirã, Marĩpure wereboerãrē ìgũsãya wiigue ñjãdorenerã ããrĩmã. “Marĩpure wereboerã ããrĩmã”, ãrĩmasĩbirinerã ããrĩmã.

³ Peresugue ããrĩrãrē bopoñarĩ merã gũñaka! Ìgũsã merã peresugue ããrĩrã irirosũ péñaka! Gajirã ñerõ tarirãdere bopoñarĩ merã gũñaka! Ìgũsã merã musãde ñerõ tarirã irirosũ péñaka! Iritamuka ìgũsãrē!

⁴ Ããrĩpererã marãpokurã, marãpokurã gãme goepeyari merã ìãburo. Ūma ìgũsã marãposã nome merã õãrõ ããrĩrikuburo. Nomedede ìgũsã marãpusãmarã merã õãrõ ããrĩrikuburo. Marãpu marĩrã, marãpokurãde gajirã ũma merã ñerõ

irimakũ ããgũ, marãpo marĩrã, marãpokurãde gajirã nome merã ñerõ irimakũ ããgũ, Marĩpũ ãgũsãrẽ wajamoãgukumi.

⁵ Niyerure maĩbirikõãka! Mũsã opari merã usuyaka! Marĩpũ ãsũ ãrĩdi ããrĩmĩ: “Mũsãrẽ neõ béobirikoa. Mũsã merã ããrĩnĩgukoa mũsãrẽ iritamubu”, ãrĩdi ããrĩmĩ. ⁶ Irasirirã gũñaturari merã ãsũ ãrĩ masĩa:

Marĩ Opũ yũre iritamugũ ããrĩmi. Neõ sugũ masakũ yũre ñerõ iridũarire gũibeã, ãrĩ masĩa.✧

⁷ Mũsãrẽ õãrõ siuu, Marĩpũya kerere werenerãrẽ gũñaka! ãgũsã okaro bokatĩũrõ õãrõ ããrĩrikũdeare gũñaka! Irasũ gũñarã, Jesucristore ãgũsã bũremuderõsũta mũsãde bũremuka!

⁸ Jesucristo marĩrẽ iritamugũ, neõ gorawayubirikumi. Iripoegue, dapagoradere, pũruguedere ãgũ ããrĩderõsũta ããrĩnĩkõãgukumi.

⁹ Gajirã gajirosũ buerire pẽnemobirikõãka, Marĩpũya diayema buerire béori, ãrĩrã! ãgũsã marĩrẽ: “Ire baaka! I gapũre baabirikõãka!” ãrĩ buemoãmakõãma. Iri buerire tũyamakũ marĩrẽ iritamubeã. Marĩpũyare marĩrẽ gũñaturamakũ iribeã. Marĩpũ dita ãgũ marĩrẽ maĩrĩ merã marĩrẽ gũñaturamakũ yãmi.

¹⁰ Iripoegue Marĩpũya wiigue paĩa waimũrãrẽ wẽjẽ soepeonerã ããrĩmã. Irasirikererã, iri merã masakare ãgũsã ñerõ iridea wajare neõ taumasĩbirinerã ããrĩmã. Jesucristo gapũ ãgũ boari merã marĩ ñerõ iridea wajare taudi ããrĩmĩ. ¹¹ Paĩa opũ waimũrã wẽjẽ, Marĩpũ ããrĩrĩ taribugorague ãgũsãya díre ãĩ ñajãdi ããrĩmĩ. Irogue Marĩpũre

✧ 13:6 Sal 56.3-4, 9-11; 118.6

masaka ĩgũsã ñerõ iridea wajare: “Béokal”
 ãrĩ sērēbosadi ããrĩmĩ. ĩgũ wējēnerã waimurãya
 dupuri gapure makã turogue soebéokõadi ããrĩmĩ.
¹² Irire iriderosũta Jesũdere makã turogue
 wējēbéonerã ããrĩmã. Irasirikeremakũ, ĩgũya
 dí béori merã marĩrē waja opamerã ããrĩmakũ
 iridi ããrĩmĩ. ¹³ Jesũs makã turogue curusague
 boari: “Gũyasĩũgorãa”, ãrĩsũdero ããrĩbũ. ĩgũ
 boamakũ, masaka ĩgũrē turi, buridanerã ããrĩmã.
 ĩgũrē irasiriderosũta masaka marĩdere turi,
 buridakeremakũ, piro marĩrõ ĩgũrē tũyaro
 gããmea. ¹⁴ I nikũgue marĩ ããrĩburi makã máa. Gaji
 makã, marĩ purugue ããrĩburi makãrē mũugasima
 makãrē yũrã yãa. ¹⁵ Irasirirã Jesucristo iritamurĩ
 merã Marĩpũre burumurã, iro dupiyuro ĩgũrē
 gajino sũnaderosũ, dapagorague ĩgũrē mũyari
 sĩnikõãrã! ĩgũrē: “Gũapũ, õãtarigũ ããrã”, ãrĩ
 burumurã! ¹⁶ Gajirãrē õãrõ irika! Mũsã oparire
 opamerãrē guereka! Irire kãtibirikõãka! Mũsã
 irasirirã, Marĩpũre sĩrã irirosũ irirãkoa. ĩgũrē
 mũyamakũ irirãkoa.

¹⁷ Mũsã oparãrē õãrõ péka! ĩgũsã dorerire
 burumurĩ merã iritũyaka! Marĩpũ pídi ããrĩmĩ,
 ĩgũsãrē mũsãrē õãrõ koredoregũ. Irasirirã mũsãrē
 ĩgũyare õãrõ buenikõãma, ĩgũrē burumurĩrē
 piribirikõãburo, ãrĩrã. Purugue Marĩpũ ĩgũsãrē:
 “Wereka yũre! ¿Naãsũ buerĩ?” ãrĩ sērēñamakũ,
 ĩgũrē yũjurãkuma. Irire masĩsĩã, õãrõ buedũama.
 Irasirirã ĩgũsã buerire mũsã õãrõ pémakũ,
 mũyari merã moãrãkuma. Mũsã pébirimakũ gapũ
 bujawererãkuma. Mũsã ĩgũsãrē tarinũgãrã, õãrõ
 ããrĩrikãbirikõa.

18 Mũsã Marĩpũre sērērã, gũaya ããrĩburire sērēbosanĩka! Gũa õãrĩ ditare iridũãa. Marĩpũ iũrõ: “Õãrĩrē irirã, waja opamerã ããrã”, ãrĩ pēñãa. 19 Yũre Marĩpũre sērēbosarã, ãsũ ãrĩ sērēka: “Mérõgã purũta ãgũ gũa purõgue dupaturi aariburire ãmuka!” ãrĩ sērēka!

Õãdoretũnudea

20 Marĩpũ marĩrē ãgũ merã õãrõ siñajãrĩ sĩgũ marĩ Opũ Jesucristo boadiguere masũdi ããrĩmĩ. Jesucristo ovejare korerimasũ irirosũ marĩrē õãrõ koregũ ããrĩmi. Iripõegue Marĩpũ marĩrē: “Õãrõ irigũra”, ãrĩ werepĩdi ããrĩmĩ. ãgũ werepĩdeare Jesús boagũ ãgũya dí béodea merã marĩrē iriyuwarikũdi ããrĩmĩ. Irire neõ béobirikumi. 21 Irasirigũ Marĩpũ mũsãrē iritamunĩkõãburo. Iri iritamunĩrĩ merã ããrĩpereri õãrĩrē, ãgũ gããmerĩ ditare irimakũ iriburo. ãgũ gããmerõsũta Jesucristo merã marĩ ããrĩpererãrē irasiriburo. Irasirirã Cristore: “Õãtaria mũ”, ãrĩ bũremunĩkõãrã! Irasũta irirã!

22 Yaarã, i pũgue yũ mũsãrē: “Ãsũ irika!” ãrĩ gojarire õãrõ merã pēka! Yũ mũsãrē wãrigora gojabodi ããrĩkeregũ, mérĩgã were gojabũ. Irasirirã irire õãrõ bueka! 23 Idere mũsãrē weregũra. Marĩyagũ Timoteore peresugue ããrãdire wiuañũrã. Dapagõrãre ãgũ aarimakũ, yũ ãgũ merã mũsãrē ããgũ waagũra.

24 Mũsã oparãrē, gajirã Jesucristore bũremurãrē ããrĩpererã iro ããrĩrãrē õãdõrea gũa. Gũa merãmarã Italia marã mũsãrē õãdõrema.

25 Marĩpũ mũsã ããrĩpererãrē õãrõ iritamuburo. Irasũta iriburo.
Iropata ããrã.

Marĩpuya Kerere Wereri Turi New Testament in Siriano

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siriano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
1a0774e8-d152-5929-891b-95e0d2238786